

М.П. Лихачев

МЕНАМ ЗОН

Роман

1

Ымьялө талун Сер посад, пизьомөн-пизьё, рад сьолөмөн панталө мича да сөдз воздуха асывсө. Талун праздник – Стречалун. Отпыр годас овлө эта праздникис да и сэтшөм кадө,көр быдөс ловзьё, быдса олөмөн- олө, путриктө-кайө вылө, цветитө...

Кольть сьолөмөсөн мыччисьё шондї, золотой сунисөн койө югөрсө. Паськаліс мича, шоньт лун. Лолалө муыс пыдына, руасьё сы вевдөрын шоньт воздухыс, малалө чужөм, юкталө мортсө, кыздз тагыя сурөн.

Лөз кудриа юрсіөн дзардө лун покатын Сер посад. Шондї нөрыс вылө көркө быдмылөма, паськалөма. Одзлань сэсса кыссьёны видззез, а эшө ны сайыныджыт сук вөр, көда отлаасьё ылын-ылын, везьясян тшын сайын, сөстөм бле-лөз рөма небокөт.

Кытчө талун дзар эн кер, кытшөм керкуө эн мөрт юртө – гөгөр лөсьөтчөны праздник кежө: стряпайтөны шаньгаэз, тупөссез, блиннэз, пуөны яшыд, кашаэз Локтас кө тшыг морт посад дынө, дак өсилейтас сылөн дульыс: сідз пөжалөм-жаритөмнас ныр кузя и вачкө.

Важынсянь сідз коми морт овлөм, эшө деддэзсяньэтө законсө пуктөмась – праздничайтөны эта луно быдөнлө. Мукөдыслөн и сейны нем, а Стречалун кежө одзөстас чужсө да керыштас сурок. Начкылас и медбөрья балясө, мед только вөлі мыйөн чулөтны праздниксө.

Быд ловья морт, пөрись и том, лөсьөтчөны праздник кежө: зонкаэз да мужиккез шондикөт мөдөтчөны,сэсса мунөны юны суррез, брагаэз; нывка-эз асывсянь тэрмасьёны отсавны маммезныслө кончитны гортся удж, сыбөрын юр зуавны, чикисьё корось мымдаленточкаэз өшлыны, топыта кышавны кадж вылө кашемировөй сарафан...

Оз кольччө бөрө и поснит челядьыс. Асывсянь дзингөны мамныс пель одзын, корөны виль йөрнө-вешьян да гаруснөй йиэз.

И луныс талун сьолөм радуйтө. И сөстөм воздухнас кокнита лолассьё, и сэтчө жө отлаасьё брага-сурьыс аскурсорөн – быдөс эта пизьөтө морт вирсө, йөктөтө сьолөмсө... Вунөтчөны миг кежө сьөкыт да курыт луннэз, зэра да тумана арся луннэз, умөллез, лөк луннэз – быдөс вунөтчөны, мый-сянь шогмө сьолөм...

... өтнаслөн өкульлөн сьолөмыс пессьё, оз адззы места, ыжмитчас зубытөдз, кытчөкө кыздз орөтчө бы, лэбзьё оланись. Нем сылө өні оз ков син одзас.оз гажөт сійө тулысыс и эта пыдөстөм, сөстөм небоыс и Стречалун праздникис.

Талун асывсянь мамыс бөра лэбтисис видчыны, көритны өкульөс:

– Пуксин тэ мян сиви вылө, ендөм көбыла, век тэныт өні жөник сайө не мунны, век пукавны гортын мирошконат! Котрасин, өвтін бөжнат, беспутнөй, стыд төдтөм!..

Пурт йылөн татшкисьоны эна кыввес öкуль сьөлөмө, пым синваён тыртöны пыдын да сьод сэтөр синнэсö.

Пуксис сiя öшын дорö, усис кисис зуыс, кöдөн только-только пондöтчис зуавны юрсö. Русöй кузь юрсиыс спина пасьтаа куделясьö. Лэдзчисьöма каджөдззас, вөвдчö кашемировой сарафан кузяс.

Сöстөм лысва төппезөн пет1сö син дорас синваэз да пондiсö туйдiсьны чужöм кузяс. Сыркьялөмөн горзiс Öкуль. Немөн сылö касьтывны бергөттөм томся кольöм годдэсö. Котöртiсö нiя казьявтөг, шупыта, лэбзисö, кыз арся төла кадö пу вылiсь листтэз.

А важын я сiя котрасис кöмтөг, öтик йөрнөсокөн, киззезтөг, орсiс аканнезөн? Учöтик юрокын эз вөлö некытшöм сьод думаэз.

Кад вежсьö, вежсис и Öкуль.

Кытчö нö воштiсисö, кытчö пышшисö эна гажөтчан томся годдэс? Вотыштiсö пыр кежö, берттөг... Визыв, сералан, гөрд рöма чужöм вылын мыччисисö пыдын кырөввез, кымöс вылас сiдз жö. Век гажөтчан Öкулись лоис из кодь чорыт, думайтiсь ныв.

Пуксис Öкуль öшын одзас, нырыштсис тшөканас киэз вылас да пондiс думайтны. Бөра öнi син одзас петiсö быдöс бөрö кольöм годдэс.

... Важын ни көркö, дас кыным год бөрлан, эттшöм жö вöли пыдöстөм, югыт небоа лун, вöли сэтшöм кад, көр горзi муыс шоррезөн, а туйез кывтiсö тулысся ваэзөн.

Сэк Чебрень Егор пырис сы сьөлөмө. Сiя тулысö пыкнитiс Öкуль сьөлөмвн радейтöмыс. Статя да вылын мыгöра вöли зонкаыт, сьод син-кыммез подковөн каспöвтiсö синнэсö, том тэлляокөн пизьöтiс нырувтас небыт гөнок. Паськөмыс Егорлөн вывтас чегö, свиттялöны лаковой сапог-гез, юрси кыз виа бордөн малыштöм.

Эз төдлы нуждасö быдмикас Егор, вексö Чебреневвез гымötисö-олисö, вексö нылөн хозяйствоас, кыз шуöны, – тырдоз.

Важын ни эта чулалiс бөрö. Эттшöм жö мича вöли Стречалуныс, кыз Öкульлөн вөрзьөтчис мыйкö сьөлөм увтас. А сыбöрын курыт ойлуннэз... Не петны, не мунны – быдөн чуньөн мыччалö: то пö Öкульлөн кынöмыс польдö. Сельничасялö, ловья гагок пö кысянькö сюрöм... Гортас аймамыс пилитöны нывкаиньöйöс дугдывтөг.

... Эттшöм жö быдса олөмөн мыччисис сэк Стречалун, золотöй көньöс пыдöсөнюр вевдöрын сералiс шондi, потiс пу вылын лист, муыс лолалiс пыдына да кокнита.

Сiя асылö Öкульлөн чужис мамлөн радейтöм. Сэк сiя казьялiс, кытчөдз ыскöвтiс радейтöмыс Егорыскөт. Дас год ни то чулалiс, а öнi эшö кыз быдöс син одзын.

Рытнас, көр посад дорын, серебро воньөн котөртан визыв Көркнеса ю дорын, öксисö том ныввез да зоннэз орсны, Öкуль сэтчин вашкыштiс пеляс Егорлö:

– Егор, сьöктi эд ме тэсянь, талун кагаö вөрзьөтчис ни сьөлөм увтам... Мый нö öнi понда керны? Ой, öшис менам юриньöй...

– Мы-ый?.. Сьöктiн? – повзьöмөнмоз горөтчис паныт Егор. – Колö зыр-тыштны сiйö, кылiн? Зыртыштны!.. Ашын жö мун Чупреика ордö, сiя чувйыштас чöрс йылөн – сэсся нем...

Важын ни Егор, кызд чөвпанись нянь шөрөм, пельдөтчө Окуль дынісь. Мөдік василёк сина нывлө ни сія лыйлө синас. Вөлі бы гажөтчыштөм, гуляйтыштөм, радейтөм – то мый юрас Егорыслөн. А сэсся мый одзлань лоо – көть турун эн быдмы. Вөлі бы том мортлө сьөлөм бурмөтыштөм, а сэсся сьокты көть эн – өткодь... Сэтшөм думаэз ветлісө Егорлөн юрас. Важын ни сія Филя Овдоть гөгөр каттисьө, кызд руч круг да круг ветлө курөг гид гөгөр.

Дыр сулалісө өтамөд одзын, сэсся Окуль чорыта горөтчис:

– Некытчө ме огш мун, ась шогмө, ась йөз насмехө лоа... ась... – Жоллыны пондіс синваыс лэдзчыны, сөстөм, кызд лысва тәппез, да пым.

– Он кө кывзы, дак сымда менө и адззылан... – кызд бытьтө видзчисис Егор энө кыввесө Окулясянь, – орөта быдөс тэкөт... Мый вөлі – сэсся оз ло!..

... Сідз сэк и янсөтчисө, сідз Окульлөн чулаліс медодзза радейтөм.

Год бөрті Егор чапкис и Овдотсьө. Сэсся гөтрасис. Босьтіс зэв богат родісь жө, яймек кодь ён нывкаөс. Свадьба кывсис мукөд посаддзөдз: гөтрасьө пө Чебрень пьян Егор, богатына, вичкуас только мунөмась двенадцать пара вөлөн, сы сьөрті позьө шуны, кытшөма чулөтісө свадьбасө.

Сэксянь Окуль эз понды адззыны чочком светсө, сэксянь сійө быд лун пондісө ёрдны аймамыс.

Бура эшө мян коми йөз коласын видзсьө важ порядокыс: шогмас кө нывкалөн кага – сія лоо отир насмехө, а кагалөн нимыс өтік – мирон. Некин сійө оз шу ас нимөн, а төдөны мирошкоөн. Сьокыт быдмыны сэтшөм мортлө, сералөны сійө пөрись и том. Сідз лоис и Мирошкөт, Окуляс зонкөт. Дас год ни тотырө зонлө, и поп сылө пырттөнныс нимсө сетіс Мирон. Сідз эта нимыс и кольчис пыр кежө.

... Дас год ни чулаліс эта цветитан кадсянь. Пукалө то өні өшын одзын Окуль, кисьтө синвасө... Быдөс эшө син одзас, бытьтө неважын эшө быдөс эта вөлі, неважын пым сьөлөмыс пыкнитіс-өзйыліс костөрөн, көр первуись пантасис Егоркөт.

Видзөт и шондіыс сідз жө сералө золотөй зэрөн, и вөрыс кыссьө конечтөм лөз кушакөн, и мича пыдөстөм небоыс голубөй бекөр пыдөсөн каспөвтө мусө. А видзөтан кө пыдөжык оланас, дак ох-хо-хо, мымда ни быдөс вежсис, мымда ни визывтіс ваыс. Не весь эд шуөны: быдөс пө визывтө, быдөс вежсьө. Луныс лун сайө мунө, кызд турун быдмө. Год бөрсянь год мунө, кызд ва визывтө.

Потіс думаэзнас Окуль. Ошисө синваэз. Только шочыника сыркьялө. А юрись думаэз некызд оз орө. Көркөся картинаэз мунөны лөдзөн, мунөны визыла, тулысся ваөң, ыжмитөны пым сьөлөмсө, көда орөтчө кытчөкө озлань, а кытчө – ачыс Окуль оз төд, кытшөм туезлань сія корсьө.

– Мам, мамук... Мыйись нө тэ бөра горзан? – Пырис керкуас да уськөтчис мамыс дынө Мирош. Чужөмбаныс сылөн вөлі өткодь кумачовөй йөрнөсыскөт, синнэз югытөсь, шупытөсь, и ачыс вөлі визыв. Сьөд юрсиыс да сьөд синкыммес – эта Егорлөн. Нырыс да синнэз – Окульлөн.

– Ох, золотөй ид тусь тэ менам, дона зоніньөй!.. Нем тэ эшө он вежөрт... Көр быдман, сэк быдөс пондан вежөртны. Сьокыт мянлө тэкөт олөмыс, арся нятя туй вылөт кызд ми тэкөт мунамө. Ох-хо-хо...

– Чөв, мамук, чөв... – бурөтө Мирош. – Көр мебыдма. Сэк быдөнныслө кужа видзны паныта кыв, сэк ме некинлө ог сет тэнө обидитны.

– Родной тэ менам, дона зониньой!.. крепыта жмитіс Өкуль морос бер-
дас ассис зонсө, пондіс малавны юрсисө да миссьотны синванас сылісь
озъягөд тусьон дзардан чужомсө.

Шонді көчыс бисерөн орсіс Өкуль синва тёпын. Өтөрсянь кыліс
сьылөм, гармоння шы каттисис, кыйсис посад саяс да өтлаасис тулысся
оланкөт...

2

Уна рөма краскаөн орсіс рытсә небоыс, бытьтө кыдз өмидзаинө пук-
сис мыдзөм шонді. Гажөн чулөтіс коми йөз Стречалунсө. А рытнас, көр
пөвсиннас ни пондіс нёджжасьны луныс, гажыс эшө содіс.

Том отир чукөртчис посад сайө, видзез дорө, сэтчө, кысянь пондөтчө
зу кодь сук тэлля, а сайланяс стенаөн сулалө пыдөстөм, вековой вөр. Быд
тулыс эстөн чулөтө Стречалун праздниксө том йөз.

Эм мыйөн касьтывнвөы энө томся годдэсө, биын сылан годдэсө, не-
быт да чөскыт дука турун вылын туплясьөмсө, тэлля коласөт гуляйтөмсө,
сьыланкыввезөн, гармоння шыэзөн, пым окасьөмөн лөнь рыт
саймөтөмсө!.. «Эх-ма. Томся кадыт эд – чөскыт ма!» – сідз касьтыштас
пөрись дзор тош ассис томся кадсө.

Сідз жө и талун, кыдз быд гожум, өксёны татчө том отир: ныввез да
зоннэз. Веж луд вылын, тэлля дорас, паськаліс кытш. Полөмөзмоз перво,
бытьтө өштісө прогассө да кошшисө, сыбөрын горөнжык и горөнжык
пондөтчисө сьывны.

Уна рөма, уна сера потшшалоккезөн вөрис кытшыс. Сэтөн и чочком
серөтөм йөрнөссэз. И кашамировөй сарафаннэз, и набивной дубассэз. Быд-
кодь рөмыс. А ленточкаэз – син гусялөны, когросьөн-коросьөн быд кадж
вылын павьялөны, кистиөн өшалөны.

Поснитжык челядьыс неылын бокын орсісө «яркаөн». Керөмась
гөпоккез, көдна вылөт тарлалөны мяч. Кин кольчас бөрын, сылісь юрсисө
изналөны кыввезөн: «ярка не ярка, баран не баран...» Лэбтасө шум,
ряксөны, вөтлісьөны кольчисьыс сьөрын. Сэсся бөра пондөтчөны мөдпөв.
Быдөн гажөтчө ас мознас, быдөнлөн аслас орсантор.

Вон видзөт круг шөрө пырисө зонкаэз гармонняөн. Везөвтчис гармон-
ня мех, серөмтчисө базаннэз, сьөрсьөн-бөрсьөн пондісө бобгыны бассэз.
Нюжвыла да горөн ольсалө-мунө шыыс вөр пасьтас и видзез кузя.

– Аннуш, ноко пондөт, Анну, пондөт гармоння увтас, – корөны ныввез.
Чиныштіс круг, сибөтчисө нывкаэз өтмөдөрсянь гармоння дынө. Кыдз
прудісь ва мезмис – укнитіс частушка:

Кытчө тійө мунатө
Да мыля менө колятө?..

Орөтчө и орөтчө мех, горзөны базаннэз, питиривайтөны асывся
каёккөзөн, киссьө коми сьыланкыв, серөмтө чужөмтө, лэбтө сьөлөмтө...

- Нывкаэз, мунам видзөтны көрталөм кыдз йыввез, – горөтчис көдакө.
- Мунам, мунам!

Кутчисисө параэзөн да иньдөтчисө тэллялань. Кылө уксөм, аксөм,
сералөм. Ловзис тэлля, шумын пондіс вөйны.

То видзёт сэтён ныв да зон нёкыртёмась кисой кыза кызоккез, да мича нылыс видзётө көрталом йыввесө, ачыс баитө: «Муна кө таво жөник сайө, мед йыввес вөлі көртассьёмась да мед путриктисө одзлань кайисө».

– Мунан, мунан, дона нывкаиньöй, ид тусиньöй... – жмитис морос бердас нывсө да чупкыны пондис окавны, кыис пөртмасьөмөн малалө каджсө, мороссэз өтлаасисө – пымось, кызд биа өгыррез, лэбтасьоны тшөка, сьөлөммез токөтөны, бытьтө и ния дыр абу адззисьөлөмась да дугдывтөг лёбөны-баитөны.

Сыбөрын бөра өтлаө өксисө мича ныввез, пондисө орсны кругөн том кызок гөгөр. Мөдөтсө сийө ленточкаэзөн, чышьяннэзөн, цветтэзис керөм юркытшшезөн. Дзик ловья сулалө том отир одзын кызокыс, оз вермы вежөртны, мыйлө сийө сідз мөдөтисө, пасьтөтисө.

Да и юав ассиныс гажөтчиссеслсь, дак и ния тожө оз висьталө, кысянь пондөтчөм эта поверьёис. Пөрись ни, восемьдесятгодся старушка эм Сер посадын – Котипелика. Сия висьтасьө, кызд и сылөн деддэс да баббес этадз жө празднуйтёмась Стречалунсө, только разь буди невна мөднөж: ния горзывлөмась кызд одзас, кормась сылсь, кызд енлсь, бур торсө олань, хозяйствотоын.

– Кут, кут Мирошкосө! Кытчө сия пышшө!.. Ёгорок, панөвт! – шум лэбтисө «яркаөн» орсись зонкаоккез. Быдөнныс кругын орсиссез бергөтчисө нылань.

Ёгорок панөвтис Мирошкосө, табанитис сылө сивилёнас. Мөдыт сунбанасьөмөн тапкисис нырнас луд вылө. Сы коста, кызд кайварышшез, уськөтчисө быдөнныс Мирош вылө да пондисө сийө изнавны юрсийөттяс.

– Ярка не ярка...

– Баран не баран...

Дыр изналисө Мирошсө. Көдалөн кыис оз төр юрсиас, сия кукушканас бокас чувйыштө, мөдик спинаас гыпкө.

– Видзөтө, кызд Миронсө овны велөтөны йөз коласын. – Ваксьыны пондисө серавны кругас том отирыс. Öтик морт эз адззись, көда бы өлис челядсьө Мирошсө вартлөмись.

Йөр дорын, неылын орсанінсяняс, керрез вылын пукалисө ичмоннез. Ны коласын вөлі и Окуль. Казялис сия – зонсө вартлөны, кыскалөны юрсийөттяс, – котөртис мездыны. Уськөтчисө челядь Мирош дынись, кызд поснит чери ёкыш дынись, асьныс сө чирзөны:

– Мирскөй-немирскөй...

– Сюрис, лөсялис!..

– Вот тэныт и ярка не ярка

– Жалейт, жалейт Мирошкотө, сэсся эд некинлө жалейтны, – Öкульыс вылө челядь вуджөтисө сералөмнысө.

Уськөтчис Мирош мамыс морос бердө, эшө синваөнжык пондис горзыны. Горзис и Окуль... Кызд кык өшөм, некинлө неколан мыррез сулалисө ния эта гаж коласын. А гажыс паськалис сө буражык и буражык.

Лэдзчисис му вылө шоньт, лөнь рыт. Лөзөтис буражык небө. Чолчком сюрөн быз-быз, кызд видзчисьтөм гөсь, мыччисис төлсь. Воздухыс сөстөм да кокнит, пыдына лоласьсө, кайө юр пыдөсөдз, коддзөтө тортсө. Письтавны пондис небоыс, кинкө кызд ем йылөн татшкалө да осьтаэзас бичиррез суйө, сідз мыччисьөны звездаэз.

А тэллядор оліс быдса оланён, койис сы дынсянь томся пизян вирён, тулысса визыв кадён, цветитан кадён. Питиривайтисё гармоння базаннэз, орлытөг бобгисё бассэз. Кыліс шум, басниэз, смех, сьылём, орсём... Нывкаэз пондөтчисё йөктыны. Кытшыс паськыт, уйёны сы кузя, кыз уткаэз ва кузя, чатыртыштасё юрнысё, чеччөвтыштасё, шовкнитыштасё, чывк бергөтчыштасё да бөра одзлань.

Вдруг гажөтчөм раммис, сувтис. Кытш дорын, кыз муись быдмисё, мыччисисё виль морттэз: урядник Сюлепеткин да Чебрень Егор. Шатласьёмён кыкнанныс пырисё кытшас. Сюлепеткин вөлі нейджит мыгөра, пельёса чужөмбана, бритөм морток. Рыжөйкодь таракан усоккез ем йыввезён орөтчисё ныр увтсис. Гардыштіс сі веськыт кинас усоккесё да горөтіс:

– Кин тіянөс тшөктіс эттшөм сёрөн гажөтчыны, а? Юасит начальствоыслісь? Арестуйта быдөннытө, тюрьмаын сісьта!..

Быдөс ланьтіс, шы некин оз сет. Серөтөм йөрнөса зонлөн, кода орсіс гармоннянас, мезмис кыис лаппез бердісь, нюжаліс гармоння мех, өтнаныс бассэз вдруг бакөстісө...

– Хе-хе-хе... – серөмтчис Сюлепеткин, – мый повзит? Хе-хе-хе... Но, орсө, орсө, талун праздник, орсө көть кузьой, только мед драка эз вөв, кыліт? – легөтыштіс чуньнас, кутчисё Егорыскөт да петісө кругсис. Синнэз сылөн пантасисё Окулькөт, кода сулаліс зоныскөт да сё эшө кисьтіс синваэсө.

– Тэ мый синватө өштан? Кин өбидитіс? – Локтіс одзас сысьясьёмөн Сюлепеткин. Казяліс, нылыс мича да лөсьыт, – ёткөп муніс сьөлөмыс. Бура сія каттисис ны гөгөр. Сорок год ни чожа тырас, а томся кадсө оз вунөт, сё нюкьясьыштілө пон моз. Кинөс леститас. Кинөс силөй босьтас... Сія – начальство, сія ачыс ыджыт, ачыс учөт.

– Вон тай, богатыналөн, Пасторов Елялөн вельмөма ни зоныс. Мый понда и вартлөма менчим зонөс... – горзөмөн горөтчис Окуль да мөртчис синнэзнас муас.

– Хм-м... вот кыз. Тышкасьны? – Шупыта сылөн юрас локтіс дума: «Эм мог кайөтны Окульсө участокө. Нарошноись гижыштам протокол. А сэсса... Ех-х, лукав жө тэ, Сюлепеткин!» Ошкыштіс сія думанас асьсө. А Егор – сылөн первөй друг, оз жө понды урядникөс вөтны. Сюлепеткин ласкова горөтчис:

– аям мекөт. Ме мыччала, кыз нылө тышкасьны! Эз на сюрлө штраф увтас! Обидитны некинөс ог сет! Протокол сы вылө гижам. Каям! Егор, тэ свидетель, лок өтлаын.

Кутчисисё ськөт оча ки да шатласьёмөн, гусьөник өтамөд коласын баитікө, пондісө кайны.

Окульлөн долытжык лоис сьөлөм вылас, көр сійө жалеитіс Сюлепеткиныс. Кыз тулысса лым сылыштіс сьөлөмыс, небзьыштіс... Адззисис өтік морт, кода кужис жалеитны, кода сувтис сы дор да Мирошыс дор. Лапкөтыштіс сія зонсө, сыбөрынляпкөтыштіс бердас да пондіс кайны бөрсяняныс. «Мыйлө Чебрень пиянсө свидетеляс пуктө? – думайтө кайтөнняс Окуль, – Разь эз бы мөдік морт адззись? Быдөнныс эд адззылісө, кыз вартлісө Мирошөс. Тыдалө, сійөн мөдө Егорокыс совестьсө вевттыны, отсала пө, дак Окульыс вунөтас важся өбидасө. О-о-х, оз вун сія менам некөр, сьөлөм шөрөдззам йиджис эта өбидаыс, немөн сійө сэтчинісь он пельдөт, он гуддышт. Ме сылө ачымөс сеті быдсөн, а сія ме вылын жө пондіс серавны. Меным жө сьөвзис чужөмам... Лөк морт...»

Тэлля дорын сувтчылөм гаж бөра сідз жө өддзис, жаралис. Важын ни лэдзчисис му вылө шоньт тулысса ой, важын ни небоас ны моз жө звездайс кытшөн орсө, югьялө, öзйыштө-кусыштө, важын ни пöрись отир пишкө-узьö гөбеч дорын да пöлатьын, а том йөз оз төд гажөтчөмлө конец, оз быр ны коласын сыланкыв, оз на мыдз вына кок йөктөмсянь, оз сайкалө калитөм көрт кодь пым тырппез окасьөмсянь...

Уна сiя ойö адззылис лөз кудриа тэлля; быдөс вевттис сiя том листнас; и сьөлөмлись өткөпалөмсö, и пым морослись лэбтасьөмсö, и ыш лолалөмсö...

... Участок ыбөс одзын ни, көда вöли сад пытшкын сулалан керкуын, Сюлепеткин бергөтчис Окульыслань да горөтчис:

– А зонтө мыйлө вайөтан? Мыйлө сьөрбөжтө? Ми сытөг вермам гижны, сылө кад ни узыны.

– Кыдз нө сытөг, сiйö эд, господин урядник, вартлисö?

– Керам быдөс сытөг. Мирош, тэ мун гортат, узь... Поснит челядльö этатшөм сёрөн ветлөтны оз позь. Тарөвтчы, тарөвтчы... Но, дак пырам, – кутис кисойөттяс Окульсö да пондiс сiйö кыскыны Сюлепеткин.

– Мун нөөмидз тусь, мун узь, ме бөрсянят жө локта, мун... – Жильк-жольк только пöднассис ыбөсыс Мирошыс ныр одзын.

Эз эд мун зонкаыт гортас, учөтик сьөлөмыс кыскө мамыс дынө, учөтик сьөлөмыс пессьö, озадззы места. Шупыта сiя чывкнитiс-кайис стын вылө да чеччөвтiс сад пытшкас, гусьöник локтiс öшын увтö. Пондiс кывзiсьны.

Ылын перво, кыдз кытөнкө пыдын ямаын, бобгисö голоссэз. Сьбөрын кылис мамыслiс голоссö, сiя чирөстiс: «Ой, отсалө... Ой! Ой!..» Сэсса шы эз ло. Кыдз бытьтө тупкисö мыйөнкө өмсö. Дрөжитө Мирош, сулалө, оз төд, мый керны. Уськөтчис мөдик öшын дынө – выдöлын сiя, нем оз тыдав. Пондiс шаритны, гусьöник котрасьны пуэз увтөттяс. Стын боксис адззис потшпон. Кыскис сiйö öшын дынө, пунктiс керку кер вылө да кайис. Видзөтö öшынö, невна сө эшö оз судз, кылöны видчан голоссэз. Нюжөтчис эшö буражык, потшпоныс нильдiс да бут-бат только усис му вылө. Горөтiс кылө Сюлепеткин, пондiс сибөтчыны öшын дынө. Повзис Мирош, ляпкисис пельöс саяс.

– Кин сэтчин, а-а? Кин ноко öшын увтас кывзiсьö? Вия видөм-ёрдөмс!.. – Ып-п да ып-п лыйис воздухас, сьбөрын горөтiс керку пытшк-ланяс: – Тырмас тэныт, Егор, лок мунам!..

Кулөм не ловья пукалө керку пельöсас Мирош, ляпкисис, бытьтө сирөн лякасис стена бердас, пиннес чакөтöны, оз вермы видзсьыны.

Оссис кылө ыбөсыс. Баиттөн, серавтөн, видзчитөн стын бокөттяс мунисö Егоркөт Сюлепеткин.

Көр öшисö нылөн оськөв шыэз, Мирош уськөтчис керкуö. Осьтыштiс ыбөссö, сувтiс порог дорас. Перво жө казялис: мамыс валяйтчö джоджас, пызан дынас, да ойзö.

Уськөтчис Мирош мамыс дынө:

– Мам, мамук, дона мамук!..

Пуксис мамыс джоджас, кватитiс морос бердас зонсö, вöлись синваыс мезмис, кыдз слевнöй зэр, пондiс окавны зонсö, причитайтөмөн герьявны:

– Ох и курыт миян тэкөт олөмыс, абу мичлуныс... Видзөт кыдз кешитчисö ме вылын нiя, көдна кийн выныс да воляыс... Ох-хо-хо...

Ылын-ылын, кытөнкө кылө посад конекас везөвтчис гармонья, саймөтис чөлөмсө гора сьыланкыв. Этө том отир каайисө видзез вылісь. Бөбалісь төв вөрзётыштис пу листтэсө ошын увтсис. Тулысся ой лолаліс шонын, сөстөм воздухон. Вичку дынын норон баксисө баяээ. Эта овлө зэр одзын. Сэтчин саяс, вөр весьтөттыс, пөртмасьөмөн югьялыштліс небоыс.

3

Стречалунсянь, лист потан, веж турун кудрион путриктан-быдман кадсянь чулаліс месяц. Часто зэрасьыштліс. Быдөс пондіс быдмыны: ыб вылын, йөрын и видзез вылын. Туруннээ цветитөны. Сукось да небытось, чөскыт дукөн вачкөны нырө – кайисө косви.

Сер посадын пондісө лөсьөтчыны сенокос кежө. Өті-мөділаын тачкөны-садитөны сосаз коссепуө, полоть увтын сьылөны төчилаээ: чз-з... чз-з...

Шоньтось да кузьось, кыз конечтөм туй, петисө луннээ Сер посад вевдөрын. Праздниккез бөрын посад бөра кутчисис удж бердө.

Нывкаээ тэрмасьөны дөра кыйөмөн да белитчөмөн. Вадөр дорын шувка-шовка вартөны нөшшез, шулюмөн вөрөны ваинпутм дөра юккез. Берег дорас – видз вылын – полосаөн-полосаөн ольсалөмась да косьтөны белитөм дөрасө. Чочкомось полосаз да сөстөмось, кыз бумага листтээ, куйлөны турун вылын.

Кокнит шоньт руон вайөтө видзез вылісь, чөскыт цвет дукөн вачкө нырө. Гөгөр цветитө, уна рөмөн рөмасьө. Локтө сьөкыт да ньылөмын пессян кад – ытшкисян кад, страда.

... Чулаліс месяц, кыз Өкуль Мирошкөт колисө чужан керкунысө. Месяц ни ния олөны Ефрем керкуын. Учөтик керкуокыс, куим ошынөн только видзөтчө, да и семьяыс Ефремлөн аслас абу учөт: сизим морт, а көр пым синваөн пондіс корсьыны Өкуль, сьөлөмыс Ефремлөн эз лэдз откажитны. Ась пө, көть дзескыт, да сө жө не өтөрын, мед пө көть кытшөмкө пельөс вөлі нывкайтлөн сиротакөт.

Стречалун рытсья «уджыс» урядниклөн да Чебрень Егорлөн ашынас жө паськаліс посад пасьта. Асывсяняс жө кылөмась да лэбтисисө аймамыс Өкуль вылө.

– Личина тэ, личина, кыз тэ мөдан чужөмтө мыччыны өтөрас? Беспутница! Стыд төдтөм!.. – чижьялө мамыс.

– землю мун өтлаын Мирошконат. Мед тэнчит ме и след эг адззыв! – горөтлө айыс да гымөтө кокнас джодж кузяс сэтшөм вынөн, бытьтө мөдө чеглавыны коккезнас плахаэсө. – Вакрамеш! Талун жө пет гортись да шатлась чочком свет кузяс! Прокленита ме тэнө век кежө! Не ныв тэ өні менам!..

– Мам!.. Тятюк!.. Ой!.. Насильничайтисө эд ния менө, насильничайтисө-ө-ө!.. – сыркьялөмөн кыскасьөпидзөс вылас аймамыс одзын Өкуль. – Кытчө ме муна Мирошкөт, кин миянлө сетас пельөссө?..

– шө өмтө лысьтан осьтлыны, беспутница тэ?.. А!.. – Кватитис айыс Өкульөс юрсисөттяс да кыскисөтөрас, кыз идзас кольтаөс, тапкис сивилөнас посөдзсяняс. Тирки-торки лэдзчис улөдз поссээ кузя Өкуль. Зоныс горзөмөн уськөтчис сы дынө да пондіс бурөтны:

– Мамук, дона мамук!.. Чөв, эн горзы, чөв... Быдма ме, чожа быдма, ачым понда шедтыны няньсө... Огө жө эд кулө тшыгйөн. Ме ыджыт ни, верма уджавны. – Кутчис мамыслө сиви бердас да пондiс окавны, аслас синваыс жолльө-лэдзчө чужом вылөттяс, сэтшөм жө курыт да сола, кытшөм нылөн оланыс мамыскөт.

Ёрдчөмөн, видчөмөн шупкаліс быдөс паськөмсө Окульлөн мамыс улица шөрас, сыбөрын гымгис пөдналис ыбөссө да каличаліс. Сымда и вөлі.

Сідз кольччисө Окуль да Мирош улица шөрө. И, натьтө, ковсис бы ветлөтны паськыт свет кузя, кытөн лун, кытөн ой, кызд бы эз жалей да эз лэдз нійө аслас керкуө Ефрем.

Сенокосө петтөдз Окуль ордө локтіс Яран Гаврил. Руч кодь сія лукав мужикыт. Некинлө пө турунъюрресө кыскавны, лэдз по Миронтө ме ордө сенокос кежас да и страда кежас. Көсйис куим пуд рудзөг сетны. Жаль вөлі Окульлө зоныс. Одзлань сія төдіс, кызд Мирошөс пондасө тшөктыны не только юррез кыскавны, но мышкырта и ытшкисьны и вундыны. Питайтчыны немөн – ковсис лэдзны.

Сідз мама-зона сенокоситны петісө торйын. Окуль медодзза куим лунсө ытшкисьны отсалис Ефремлө, а сыбөрын муніс подөнщичайтны Яран Гаврилыслө жө.

Жар. Пөжө. Сьөкыта лолассьө эттшөм шонит гожумся лунө. Небоыс бытьтө пьдөстөм голубөй бекөрөн каспөвтө мусө. Куделясьоны чочком кымөррез. Дыша сөйөны косаэз турунсө, чожа ния ныжмөны песока көс турунө.

Лысва төппезөн дзуллясьө кымөс вылын ньылөм, уна вожжезөн туйдисьө, котөртө чужом кузя, вадө йөрнөссэз, сола-сола шороккезөн пырө өм доррезө.

Көстөны коснысө сьөрсьөн-бөрсьөн мама-зона Гаврилыс паськыт видзез вылын, шедтөны кусөк нянь.

Яран Гаврил ветлөтө покос кузя, сералыштлө өм пельөснас, гыжьялыштлө коссө йөрнөссорнас, ызйөтө ытшкисиссесө:

– Но, но, позьөтө киэзнытө. Бур таво турунокыс, сук да небыт, кызд тай шёлковөй чышьян. Мирош, Мирош, эн кольччы мамыт сьөрись. Быздыль!.. Мыйкө ма поззэз тай коса нырыт кошшө. Вай ноко косатө лопатитыштам, кокнитжыка пондас ветлыны.

Кыскис Гаврил учөтик бановөй пуртөсокись, кызд пешоркаокись, көда вөлі домалөма коскас йи бердө, лопатка-зуд, вөтьыштіс ваө да пондiс лопатитны коса.

Чинь-бринь, чинь-бринь, чинь-бринь – кылө лопатитчөм шы. Мөдөрсянь.нюр дорсяняс паныт сылө шонит руалан төлок вайөтө сэтшөм жө шыэз. Каттисьоны эна шыэс воздухын, сорласьоны видзез вевдөрын сук свежөй турун дуккөт.

Гогольөн видзөтө Мирошлөн коса Гаврилыс кийн, коссөпу асыкалөм сылісь кынөмсө да видзсьө йи бердас. От кийс видзө косасө, а мөдыс ветлө лопатканас, кызд мөс нюлө тырппесө чөскыт пизя помой юөм бөрын.

– На, Мирош, ытшкись. Да велөтчы буражык өвтны, шупытжыка. Видзөт, кызд ме ачым ытшкися. – Гаврил чапкис коссис лопатка пуртөссө, босьтіс зуд туис бокись ассис косасө да муніс медодзас. Нюжөтыштіс киэсө да мышкыртчис. Кузь сія вөлі мыгөрнас – стожар сувда – да вөснитик, кызд ректан. Юрси – шпынөн, тош – урбөжөн. Коккез майөггезөн мөртчисө муө,

көстисис му бердөдз да пондiс өвтны косанас өтмөдөрө. Нырөн пырөтчис турунө, керис аслыс виль покос.

Шрр-р-р да шр-р-р – ветлө турунөт коса, валькыта пөрө и пөрө турун, ледзезон колө бөрас. Оськөв-мөд Гаврил мунис покосон, сэсса сувтис. Бергөтчис бөрас да ошшасьомон горөтчис:

– Адззан, Мирош, кызд колө ытшкисьны. Коса дорсө весь эн ныжды, сапырнит сийон турунсө мымда төрө. Коса йылас эд нянь кусөкыс. – Медбөрья кыввезнас сия павкөтис мукөд поденщиккесө ни. Нылө козьналис энө кыввесө, мед эшө перытжыка ытшкисисө. Ачыс сэсса мунис покос дорсис телегаэз дынас, пуксис өтик телега увтө шондi сайө да пондiс везтыны-юны шонит брага, көдө вайис аслыс торйын нейджит серөтөм туисын. Юө, ачыс өт синнас видзөтө, оз я кин поденщиккес коласись сулав, оз я кин жагөна вөрөтчы.

А шондi пөжө. Юр вевдөрын ни өгралө, чатрасьө, өвтө пым мороссис биа югөрсө, кольмөтө ытшкисиссесө, пакмөтө нылись өм пытшккес.

Павжуннас ытшкисянино локтис Чебрень Егор. Казялис Окульсө – повзыштис моз, гөрд рөмон вевттисьыштис чужөмыс, но чожа босьтис асьсө киас. Горөтчис Гаврилыслө:

– Бур, батя, Гаври, видз вылат туруныс, сук да вылын. Натьтө эта видз вылись сувтөтан таво кос дас кынымө.

– Кайыштөм, ен сетөм, только мед зэр увтө эз сюр. Кызкө вовремя бы дзимлявны. – Дзильскө-зудьясьө Гаврил, баиттөн кеслө косаэсө.

– Но, көда эм, сийө дзимлялан ни. Видзөт жө уджалиссесө мымда өктөмыт, быдөс ёнөсь да вынабсь.

Нывкаэз вак-ва-ак серөмтчисө. Öтик серавтөнныс виньдiс лук турунөн да кашляйтис седытөдззас.

– Но видзөт то кытшөм гажа Гаврил видз вылын, жив тай, мокась, орсанинын, – сибөтчис павжнайтиссез дыно эшө өтик морт – Гунда Ваврей.

Видзез нылөн вөлисө ордчөн Яран Гаврилкөт. Гудалөн клинөн пырөма нюрланяс, джын видзис көчкаа да баддяин-ыжман увтын. Джын видзсө только и ытшкывлис. А нюрсө нем вөли ытшкыны. Эшө сенокосөдззас сийө ыжманалиссез талясө, турунсө быдөс воясө – сэсса көть эн и лок косаөн. Год-мөд ни Гунда мырсьө бы, керө помеч – көчкасө орлавны да нюрсө весөтны, а выныс оз тырмы. Көркө и Гаврилыслөн видзис вөли көчкаа. А өни то видзөт: горпод кодь волькыт, кос сувда каяс сук пырей. Вит год гөгөр ни чулалис, кызд сия помечезон весөтис этө видзсө. Ошшасьны өни оз вермы, туруна годө десять, двенадцать косон сувтөтө. «Кужө Гаврилыс оланись бур торсө куртны. Не миян моз, мокасьыт, олө, чорыта стожар кокыт мөртчөтө пиннесө хозяйствоас, айыс моз жө кужө поздисьны шонит позө». Думайтөмон кыскис кармансис трубкасө Ваврей да торс-торс вачкис гыжпонас.

– Көда нө куритөтат? Наршно эд куритыштны локти. Көсөдз бырис табакө. Эттшөм олөмнас, мокась, и овнытө...

– Ой-йой-йой!.. – дивуйтчө Егор, быдса мөскок ни тай заводитөмыт. Етша тэныт этчө колө табакыс, восьмушкаджын эд. На инө, на, курит. – Кыскис Егор кучиковой кисет да чепольнас сетис Гундалө. Мөдыт тэчис да өзтис. Швар да швар пондi папкыны-куритны.

– Уна и дьөгөдь, тыдалө, тэнат өксьөма трубка пытшкас, сералөмон бөра горөтчис Егор.

– Эм невна, мокасьыт, өксё тай, кысь и өксё.

– Сувтö, сувтö. Мый нö барыняэз моз тай пондiт сёйны. Некöр эд чöсмасьны. Бур лунокыс сулалö, минута оз ков весь овны эттшöм лунас. Видзöт, менам и косаэс ни кеслiссисö, а тийö тай мыйкö сё эшö öммезнытö вөрöтат... Сувтö, кад ни...

– Оз эд то, мокасьыт, весь видз уджалiссесö, – горöтчис бöра Гунда. – Сiя сiдз: нянь кусöкыт весь оз сюр. Мед пöт вöли дзез. Вынтö буражык пес... Хе-хе-хе... Сiдз эд, Егор?

– Он бöбöтчы, дак сiдз. – Дзар керис Егор Öкульыс вылö, пильс серöмтчис да нем сэсса эз шу. Öкуль сапырнитiс ассис косасö, пидзыртiс сийö киас, лög дзаркерöм чапкис синкыммез увтсаяс Егор вылö да шупыт оськөлөн мунiс покос дынö.

Егор висьталiс Гаврилыслö:

– Петав, Гаврил, ашын миянö, кресення эд ашын, брага юны.

– Ладно, ог кö пондöт ты дорас тэчны. Колö тэрмасьны, кытчöдз бур погоддяыс сулалö.

– Но, тэчасö и тэтöг, только мед приказыс вöли сетöм. Жын-жын лэбас зородыс... Петав.

– Сiя сiдз: деньгаыт да нянь торыт быдöс керö – ытшкö, вундö и гөрö... Хе-хе-хе...

– Мунам, Гунда, тырмас тэныт лёбны. Куритыштiн, öнi сьölöмыт бöра бурмис, мунам.

– Мунам, öвтам-керам бöра, орлалам кöчка юрресö...

Гаврил кольчис читны ассис косасö. Дзильскö-тöчитö, а ьачыс пöv синнас чуть да и видзöтыштлиö уджалiссеслань, оз я кин кошшы коса йывнас ма поззэсö.

Паськытöсь Яран Гавриллөн видззес да волькытöсь. Медбур местаэз нылөн Чебрень пияннэзкöt. Идзас стопаэзөн кыссьöны вылын, кыз кынöма турун зороддэз. Тэрмасьöны ытшкыны мича луннэзас жö, пыр кужöны нiя йöз выннас керны ас кадö: öктасö подёнщиккесö, кык-куим лунөн уськötасö да лун-кыкөн куртасö, тапкасö тэчасö веж, свежöй туруноксö зороддэзö. Нянь нылөн керö быдöс, сусек пыдöссэз эттшöм богатынаэзлөн оз мыччисьлö некытшöм тшыгьялан годö.

Коса тöчитöм бöрын Гаврил чеччис да мунiс ытшкиссес дынö. А нiя гона кык кузя ни мунiсö покоссэзөн. Кышöпөн пöрö сук турун лэчыт косазз увтын, вежötöны коса доррез, чожа емйивсялöны, ныжмöны.

Быд вынiсь Мирош öвтö косанас, вötчö покоснас гыриссес сьөрö жö. Оз эшö судз выныс, люззьö чужöм кузяс ньылöмыс, сола-сола шорокөн котöртöголя вылötтяс, йөрнös воротас.

Жарыс пöдтö. Рытланьö ни бергötчис öгралан шондi, а сотны оз на дугды. Руалö шоныт воздухыс, шоныт тöлокөн ырым вайötыштас, пöльтыштас чужöмö. Сэсса бöра лöняс, сьökыта лолалö луныс и оланыс. А видззез вылын отир шуксьö – ытшкиссьöны, куртöны, рыт кежас пондiсö гриббезөн мыччисьны гögрöса туруньюррез, лэбны сыналöм зороддэз.

Дыр талун ытшкötiс подёнщиккесö Гаврил. Важын ни ырым вайötiс нюрланьянь, кыздз кинкö нарочно пöльтыштiс кöдзыт ру. Кокнитжыка лоласьö. Ылö кылö тачкöм – коса тöчитöмыс. Эта ыркыт кадö, көр

дышөтчөмөн, везъясьөмөн малалө лажмытіннэсө чочком тоша туман, көр сорласьоны лопатитчиссезкөт герскан шыэз, эшө буражык пондөтчө пизьны удж. Ытшкисьны ыркыт, турунокыс небзьө, марскө-сөйө сийө косаыс.

– Ытшкыштам этө «көчөксө» да сэсся талун и тырмас. – Эна кыввезөн мышкыртчис Гаврил косанас, кокыштіс раз-мөд өтмөдөрө, мукөдсө ызийөтөм могись, да сэсся бөра лэбтісис, пондіс коса йывнас рознитны турун лөдззесө. А «көчөкыс» вөлі не учөт не ыджыт: вит кыным турунъяур өксяс.

Важын ни рөма, лөз небоын золотөй зэрөн кыйсис звезда чукөрыс. Югьлө, бичир синнэзөн орсө небө. Өті-мөділаын видззес кузя мыччисисө биэз, тшыныс кыйсис везъясян туманкөт.

Гунда Ваврей гольгөмөн гөнитіс семьянас Яран пьян покос дынөт. Ытшкисиссес весьтын лоис да горөтіс:

– Гаврил, тырмас ни, тырмас, тэ тай уджсө керны письтан, он я мөд ытшкөтны усьтөдз?.. – ачыс ныкөстіс вөвсө. Телегаыс гольөтөмөн саясис пемытас. Шы эз сет сылө Гаврил. Мышкыртчис да бөра размөд кокыштіс косанас. Чорыта видзис горөтчөм кывсө, сідз и керис: «көчсө» ытшкыштісө, сэк вөлись пондісө лөсьөтчыны кайны гортө.

Нималісө-висисө коссэз, не тэрмасьөмөн оськалісө ытшкисиссез видззес кузя посадлань. Мирош котөртіс мамыс одзын. Кытчө чужийяс, сэтчө чуть оз усь – мыдзис сія өддьөн, висисө киэз и коккез. Уна я эшө сылөн етш, а мышкыртісө ни ытшкисьны, быдса лун копырасис Яран видз вылын.

Өкуль кайис медбөрас. И кытшөм думаэз сылөн каттисисө юрас – сьөкыт вөлі төдны. Только пыдына ыш лолалөм сьөрті позис думайтны – эна думаэс сылөн вөлсө сьөкытөсь, кыз свинец, конечтөмөсь, кыз эта жө конечтөм оланыс...

4

Сер посад шөрын сулаліс кыксувда керку, виль, чочком полисадника, лунланьянь лөз стенаөн тыртөмась керку боксө гырьсь, кудриа важ льөмпузэз, тополлез да кыздзез. Эстөн и вөлі волостной правленнө. Паныт ськөт сулаліс мөдік сэтшөм жө керку – лесничөйлөн. Сымда и вөлісө посадын кыксувда керкуэс. Волостнойө пырикө син вылө усьө нейджыт вывеска, өтік көрт лист вылын. Джын букваэсө незьдөтөм ни ваыс краскасорнас, гербас өт орөлыс юртөм. А мөдыслөн джын бордыс зыртчөм. Тыдалө, год-мөд ни некин абу дзар керөйөм эта вывеска выдө. Но, өні пырам пытшкас, видзөтам, тый сэтчин керсьө.

Медсаяс чочкома белитөм. Югыт да сөстөм жырас пукалісө старшина писарькөт. Ыбөс дорсяняс жө нылөн жэырыс вөлі торйөтөма ганкаэзөн*, пызаннэз сайө эз позь пырны.

Старшинаыс – Пасьторов Еля, сьөд, сук, зыр кодь паськыт тоша, гөрд чужөма мужик. Пеллесис и нырсис сылөн чур видзөны гөннэз, кызд резьдөм подушкаись. Вөл сія вылын мыгөра, ён, сьөд суконной шабура. Морос одзас пежьяліс виль медаль.

* Ганкаэз – перилаэз.

Веськытланяс сы дынсянь пукаліс писарь. Сы пызан вылын чукөрөн-чукөрөн куйлісö бумагаэз. Ёся тошокыс писарьлөн бытшкисис пызан до, кийс шупыта кырлаліс лэчыт пероён бумагасö, дзуртöмөн. Кокнита ветліс сы вылöt.

Ганкаэз саяс сулалісö Окуль, Мирош да Яран Гаврил. Гаврил малаліс тошсö да ласкова баитіс:

– Но, Окуль, эн ни абусис сулав. Бур цена ме тэныт сета, нем ни пыксьыны.

– Весь тэ, батя, покорень весь мöдан медötны. Разь сія уна?

– Эшö шу етша: вит год понда сто руб деньгаён да дас пуд рудзög. Эта эд быдса капитал ни. А уна я жö сія пондас уджавны? Челядь эд эшö... Вöв юктавны, пинявны да туруньюррез кыскавны...

– Тöда ме, кыз тійö уджötат. Небось, весь од видзö, быд сетöм копейкасö даспöв кыскат. Мый нö керны, Мирош, мунан?

– Муна, мам, ась. Сьökыт не сьökыт, а питайтчыны мыйöнкö колö эд.

– Мый эд керан, муыс тэныт оз сетсьы, көть кыз ов, горötчис мамыс. – Уна, натьтö, ковяс тэкöt синвасö кисьтны, уна адззылам пемыт ойлуносö. Ох-хо-хо!.. Пельдötіс мянös оланыс отрыс коласö, а туй вылас петкötны эз вермы... Кыз то öні сы вылöt мунны, кыз туйдисьны – сійö некин оз тöд, сійö некин оз висьтав...

– Но, эн норась олöм вылас. На жö гижсьы, – нюжötіс договорсö старшина.

– Мый гижя, ог куж да. Миян кодьöмсö разь велötасö... Ась гижсьö вон тай писарьыс, – шыасис Окуль.

– Гаврил, ноко гижсьы, а тэ, Окуль, петав да адззы кинöскö гижсьыны, писарьыслö абу эд бытшöм быд неграмотнойыс понда гижсьыны, сэтчö только сія и кадсö пондас öштыны, а көр нö сэк уджавны? – старшина нюжötіс бумагасö Яран Гаврилö. – Петав, петав, кошшы.

Окуль чышкыштіс чышьян пельöснас нырсö да петіс ыджыт жырас. Мирош бильнöй моз сулаліс ганкаэз дорас Гаврилыс бокын, кырлаліс мыйкö чуньнас ганкаас да видзötіс писарьыс гижöм вылö. Учötик юрокас эта коста сылөн каттисис ыджыт дума: «Ме велötча гижны, ме велötча лыддьötны, ме понда некин оз понды гижсьыны, ме ачим, ачим...» И эта думаыс йиджис пыдына сьölöмас, поздісис сэтчин да кольччис колана могön.

– Мирошко. Мый нö думайтан, быздыль? Оланыс эд тэныт ме ордын лоас бур, пöттöдз пондан сёйны, вура ме тэныт вильйөрнös-вешьян, кыям виль нинкöммез – молодец кодь лоан, көр локтас мамыт, дак оз и тöд, – ошшасьöмөн моз горötчис Гаврил.

– Только мед кывзыны, паныт не горавлыны. Мортö тэнö мөдö пыртны Гаврилыс, кылін? – содтіс старшина.

Мирош сулаліс, шы эз сет. Только эшö буражык мышкыртіс юрсö, бытьтö эна кыввес сьökыт изөн сötалісö сы юр кузя да мышкыртісö сійö муланяс, кыз еёкыртіс төв том да няр кыззökös.

Пырис Окуль. Бöрсяняс мыччисис неыджыт мыгöра, пестрединнöй виль йөрнösа том зонка. Коккез вölісö каттьöмösь лым кодь чочком сöдзвой нямöttэзөн, гөрд воня, виль нинкöммеза. Окуль сибötчис ганкаэз дынö да горötчис:

– То, адззи.

- Тэ грамотной? – юалис зонкаыслісь старшина.
- Мало тай кырлала.
- На, гижсы то этчө, то, – мыччаліс чуньнас старшина.
- Зонкаыс мышкыртчис, ёна эд нямыртіс чуньпоннэзнас ручкасө да пондіс гигинь-гогинявны бумага кузя. Оз кывзы киыс, букваэз, кызд кодось, пиньласьёны өтмөдөрө, важ стынөн вевттьёны бумагасө. Дыр эд гуддисис, сэсса пуктіс ручкасө пызан вылас да чышкис ньылөмсө.
- Важын ни эг гижлы да вунөтчыны ни пондіссөм, – горөтчис зонка, ачыс гыжйыштіс конувтсө да шысеттөг петіс ыбөсас.
- Тэ, Окуль, висьтав Миронытлө, ась сія Гаврилсө кывзө кызд родной айөс, умөльө эта мортыс оз велөт. Удас-вердас зонто, отирө петкөтас, – баитіс старшина.
- Мый сэсса керан, сьөкыт быдмыны айтөг, ась велөтчө, ась шедтө аслыс няньсө.
- Дак мый, Окуль, өні жө сія ме ордө ась и мунас. Ашын тай думайтам страдуйтны петны. Сьөкыт, шуёны, понедельник луныс, а ме мөда пондөтчыны вундыны, бура ни лун покатас воёмась рудзөггес, кышөтөны шеппес, корёны чарлаөн.
- Ась инө мунө, бөр эд өн. Кывзы, кага, Гаврилсө, кывзы да велөтчы бур уджө, пет мортас, эн понды овны отир насмехын, – Окуль малыштіс зоныслісь юрсисө да чуп окыштіс кымөссө.
- Мунам, Мирош, – корис петтөнняс Гаврил. – Прощай, Елизар Тихонович, Иван Ефремович... Адззисьлытөдз! – горөтчис старшиналө да писарьлө.
- Прощай, прощай... – старшина сувтіс да пондіс печатьсө суйыштны пызана.
- Мун, кага, мун, – иньдіс Гаврилыс бөрсянь Окулыс ассис зонсө.
- Эн вунөт менө, мамук, вовлывлы частожык, – горөтчис Мирош петтөнняс.
- Ладно. Ладно, – шыасис Окуль. Казяліс сія, кызд старшина дзимлялө печатьсө, бумагаэсө да замокалө пызансө. «Кытчөкө, тыдалө, мөдө мунны», – думайтыштіс Окуль. – Колө юавны бы заявленнө йылісь, да писарьыс бөра пукалө, көза тош... Кыдзкө абу бытшөм сы дырни».
- Онджа... Елизар Тихонович... Мөді ме тэнчит өтік тор йылісь юавны... – полөмөн моз, мыкталөмөн горөтчис Окуль.
- Мый сэтшөмыс? Висьтась, юась... – малыштіс тошсө. Лөсьөтыштіс морос вывсис медальсө да пкөуксис Окулыс одзө.
- Заявленнө ме сетлі вон тай писарьыслө, тшөкті бы иньдыны земскөй начальник дынө, да иньдіс нө сія алаи эз?
- Заявленнө? Кытшөм заявленнө? Мый йылісь? – юалис старшина, ачыс дзар керис писарьыс вылө.
- Писарь юрсө лэбтыштіс да тэрмасьөмөн горөтчис:
- Иньдім. Видзчись, мый гижасө ответсө... Сыбөрын висьталам...
- Ладно инө, видзчися, шуис Окуль, – колө кошшыны правдасө, отсалө тійө меным, этадз көть эд и начальствоыслө, да оз жө позь керны.
- А тэ кывзы, мый баины – керам, мыся... – өмаліс бөра сійө писарьыс.
- Керө нө мыйкө, өддьөн кеймися... – горөтчис петтөнняс Окуль. Ыбөсас сія пантасис урядниккөт. Дзар керис сы вылө урядникыс, шынь серөмтчис да юалис:
- Кызд ни олан, Окуль? Сө цветитан, чужөмыт өмидзөн сотчө... Эх-х, тупөсь кодь эд инькаыт – небыт да виа...
- Окуль дзар керис сы вылө, бичирөн сотіс синнэзнас. Чурскисис-бытшкисис сы чужөмө, зубытөдз жмитіс аннэсө да шупыта петіс присутствосис.

– Мыйкө тай лөгасьыштөм инькаыс, ті я мый я лөгөтитө? – юалис старшиналісь урядник.

– Ми? Эгө-ө, мый тэ, мыля сідз...

– Тэ вылө, тыдалө, лөгасьом да... – горөтчис шыннялөмөн писарь.

– Ме вылө?

– Мыйно. То тай заявленнёйс, писарь кыкис пызансис бумагаэз увтись нейджит нөитөм гижөток. – Видзөт, Елизар Тихонович, Сюлепеткиным өті лунө бөбалыштөм...

– Ме? Кытөн, көр? – гөрдөтыштөмөн юалис урядник.

– А Стречалун лунас... Абу я нө маласьны пондылөмыт, Окульыс гөгөр каттисьны? – пильс серөмтчис писарь.

– Кин этө висьталіс? А? – повзьяштөмөн юалис урядник.

– Заявленнёйс...

– Заявленнё? Окульыс гижис заявленнё? Көр, кытөн сія? – чапкис Сюлепеткин фуражкасө пызан вылас да дернитыштис мундир полаэсө.

– Э-хе-хе!.. Сюлепеткин, тэ пөрись көин кодь тай: сө ныртө лэбтан вылө! Он бы лэдз чөскыт торсө, бөбалан кувтөдз дзар керыштлан Окульыс вылө?! Э-хе-хе... Тэ, батя, Сюлепеткин и эм, быдлаө письтан, сьөлөмыт, шуан, бичир кисьтө... Н-да-а... – Старшина бергөтліс киас заявленнёсө да сьөлөмсянь, киксөмөн сераліс, ачыс гыжьяліс тшөка увтсө.

– Да кыз сія лысьтис этө керны, кин ноко сійө велөтис, кин? – лөгөн горөтліс урядник.

– Ачыс вайис, – шуис писарь, – недель-мөд ни куйлө менам пызанын. Кыз бы эз юав талун ачыс Окульыс, дак ме и вунөті ни бы сы йылісь. Шедіс бы көр ки увтө – косялі бы, сымда и вөлі... А то, лешакыт, юасьө...

– Н-но, повны быдкодь зырымыслісь! Кин сылісь повзис? Тэ, Сюлепеткин, өддьонсө эн ордав, эн видз весь вир. Нем эз вөв, нем абу. На заявленнёсө, Иван Ефремович, суйышт пьдөстөм папкаас, ась видзчисьө ваше благородие – земскөй начальниксө. А тэ, Сюлепеткин, – менам ки, ме – тэнат ки... Кык вына ки, куимөт – Иван Ефремовичлөн. Хе-хе-хе... Сылөн көть и абу вына, да серөтны өддьон кужө бумагасө... Быдөс кужам, быдөс керам, кыз миянлө колө!..

Писарь чиж-важ косявліс заявленнёсө да бумагаторресө койыштис пызан увтас, ачыс шуис:

– Правдаыс – мияндор, Окульыс правдасө төв нөбөтис... Öвтыштис – и абу правда – өшис... Ха-ха-ха...

– Молодец. Иван Ефремович!.. сералөмөн шуис старшина, – уджавны тэнө оз ков велөтны.

– Но, өні мунам миянө, – фуражкасө босьтікө, горөтчис Сюлепеткин, – өддьон бур черинянь талун керөма инькаө, едіэзісь. Мунам... Да эд төдат – чериыс көсөт оз уяв... Кхе-хе... Мунам!

– Ветлам, Иван Ефремович, кад ни талун кончайтны. Видзөт, шондіыс бергөтчөм ни. – Старшина пөдналіс кладовөйсө да суйыштис ключсө сапог голенищеас.

Волостнөй правленнёйс петисө куим морт, көдна сайын вөлі быдөс выныс да правдаыс, көдна веськөтлісө Сер посадөн, шамыртисө быдөннысө кырыманыс.

5

Локтис страда. Сер посад гөгөр, лун покатын, чочком чышьянөн гыасисө воөм рудзөггез, кыссисө пыр Гыркалог сайө, вөр дорөдззас. Шонит төлок увтын воөм рудзөг шеппез кокалісө өтамөдныслісь юрбөррезнысө, кышөптисө, шушкөтчисө. Ой покатын да рытланяс

тыдалісö лöz рöма зöррез. Ленточкаэзöн, ленточкаэзöн, быдкодь дöмассэзöн кыссисö зöр муэз, пыкötасисö пыр Грибан деревняöдз. Рудзöг йöр коласас да зöр йöр коласас паськыт полосаöн нюжалöмась паррез.

Кыз рудзöггез да зöррез коласын, сідз и паррез вылас бура тöдчисö, торьясисö гырись дöмассэзöн полосаз Яран Гавриллöн, Чебрень Егорлöн да Пасьторов увтырлöн. Торйöн тöдчисö нылöн полосаз, да и сюыс вöлі сукжык да кузьжык, зöрыс путриктöм-кайöм, пизьötöма тырдозöн. Тыдалö, унажык жö нылöн полосазныс адззылöмась назёмсö.

Гаврил муэзкöt ордчöн полосазз Ефремлöн. Гажтöма гогышасисö рудзöг шеппез, бытьтö кыз горзисö ния, öтамöднысö öштöмась да. Полосазз Ефремлöн нюжалісö ленточкаэзöн – пиняöн мунны некыт, а Гавриллöн – вит-квать лека пасьтаöсь, синнат он кут.

Копырасьö ни Ефрем семьянас аслас муок вылын, «ягöдалö», гуддисьö, öктö шеппесö. Озь узь и богатина Гавриллöн муыс – шум сулалö. Дзавскöны лэчыт чарлааз кыз нюдз шепсö. Двенадцать подёнщик сулалö постать дорас да аслас семьяыс нель морт, витöt Мирошыс. Паськыта муно постатьыс, лёдзöн-лёдзöн куйлöны кольтааз. Гаврил пукалö постать дорас, папкö-куритö да тэрмötлö вундiссесö:

– Мыйкö кымрасьны пондiс, падмötас уджнымöс... Тэрмасьö жö, көть этö постатьсö бы кызкö петкötны...

А постатьыс абу учöt, абу дженыт – куим гона колö вундыны. Да и луныс мича да шондiа, некытшöм зэра кымör оз тыдав. Только борда кымörрез вылына куделясьöны, тэрмасьöны öшötчыны, пышшыны рытланяс. – Тэрмötлöм могись сідз повзьötлö Гаврил подёнщиккесö.

– Мирош, тэ тай бöж вылö кольччöмыт... Тэрмась, тэрмась, сапырнит да сапырнит... Сюсö бурö таво еныс сетöм, сук да небыт, только дзавскы да дзавскы... – Учötик синоккез Гавриллöн шылаэзöн ветлöны постать дор кузя, вöджжöны, кин везьясьö бöж йылын, кин мый ыждаö керö кольтасö, зэлыта я йиалö. Лэчытöсь сылöн синнэс, кыз каньлöн, нем он дзед сы синнэз увтiсь.

Мырьсö Мирош, öстатки вынсö öктö – вötчö гыриссес сьөрö жö. Ньылöмыс дзуллясьö кымöс вылас, вотялö – юкталö мусö, пырö синнэзас да бура нийö сөйö, тырппез вывсис павкö öмас, солася-сола, эшö буражык пакмötö öм пытшксö.

Ыб пасьта горалöны голоссэз, уна рöмön рöмьялöны чышьяннэз, йөрнössэз, кофтааз... Плешасявны пондiсö, кушмыны рудзöг ыббез. Лёдзезöн мыччисьöны пашмöм юра суслоннэз.

Ньылöма удж, кос висяна удж...

Ефрем му постать дорын копырасьöны куим морт, öктöны шочыник сюсö. Дыр колö мышкырасьны, öктыны кырымсö. Эз на позяв медозза лунас кос – висьö, нималöмön-нималö, покорень орö. Ефрем веськötчыштас пуктыны кырымсö, дзар керас шондi вылас, абу я кад ни павжнайтны. А шондi ваксьö-сералö, пöдтö шоньтнас, оз и вөрзьötчышт, öшалö юр вевдöрын пизян золото төпön. Кузь эд луныс, век кузя, он сылісь адззы и конецсö.

Дас суслон сувтiсö Ефрем му вылын павжун кежö. Гаврил полоса вылын сяр сулалісö кык лёдзöн суслоннэз.

Павжнайтiкö Гаврил велötö Мирошсö:

– Уджав вынөнжык, уджав удавжыка, сэк и павжнайтан буржыка... А тэ, Мирош, бöж йылын жö пыр летьялан, кольтаыт поснитик, куйлö шочыника.

– Кыз сэсса тэныт и уджав. Мырсян, мырсян – сө умöль, сө жаг... – аснырасис Мирош, дугдiс сөйны, мортiс синнэсö муас.

– Но, эн лөгав, учөт эшө, шег кодь, а лөгавны ни кужан, мирскöй, дак мирскöй и эм... Тэнö жö велөтöны, да тө жö и лөгасян. Весь тэнö няньнас некин оз понды вердны.

Мирош шупыта чечыштис сёянисис, чапкис кисис курччөвтөм картошкасö, нянь кусöксö да лөгөн мунис суслон бокас. Подёнщиккес чөлісö.

– Мирскöй-немирскöй!.. Асныр!.. – пиннез коласөттяс сысьялис Гаврил. Ачыс чеччис, мунис Мирошыс дынö да кукушканас ковкис сылö юр пыдöсас.

– Ныртö эн лэбтав, асныр!.. Чаль кузя эд эшö абу, а лөгавны ни кужан... Мый тырппетö öшөтöмыт? Сёй мун да и уджавны колö!

Сідз кукушкасорөн пондисö велөтны Мирошöс йөз отир, сідз сія öштис гортсö дас годсянь, пондис вузавны ассис зорамтөм вынсö богаттёлö. Сьökыт изөн пуксис юрас думаыс эттшөм олан йылись, курыт вöлі учөтик сьөлöмын.

Шы эз сет Мирош. Юрсö öшөтөмөн мунис постать дорас. Подёнщиккез пернапасасьөмөн чеччисö межа дорись, босьтисö чарлаэз да сідз жö иньдөтчисö постать дорö.

Шондi лэдзчандорас Гаврил полоса дынö локтис Ефрем. Ёна мужикытлөн медодзза лунас мыдзис косыс. Шоччисьөм могись локтис байтыштны.

– Нильöп тай тэнат, Гаврил, мунис полосаыт, öтик лунөн, тыдалö, мөдан ештöтны.

– А вундыштны бы талун колö, оз ни унасö коль. Воöма бура ни рудзөгыс, колö тэрмасьны, – гыж-гыж керис тошсö Гаврил да öзтис трубкасö.

– Но, кызд уджалö виль строшнöйыт? – юалис бöра Ефрем, – удав эд зонкаокыс...

– Мирошкоыс?

– Мыйно.

– Асныр кодь жö мөдö быдмыны. Неважын тай лөгасьлис. Тэрмөтла сё бы, тэрмөтла, велöта уджавны, а сія нырсö пиньөвтö. Чаль кодь эд эшö учөт, а кужö лөгавны ни.

– Велалас эд, колö только кужны велөтны, зонкаыт öддьөн визыв, – пондис бöра байтны Ефрем.– Öкулыс тай вöлі висьтасьö: ытшкисьны ни пö вермö, а уна я эшö сылөн вын?

– Ма поззэсö жö унажыксö кошшö, абу жö эшö прокыс, – öмалис сийö Гаврил, – а öддьөн мөдö, тыдалö, асыра быдмыны, чуть мый горөтчан не сы сьöртi – нюжөтас тырппесö, юрсö öшөтас да шы оз сет, абыз кодь...

– Бур погоддяыс сулалö, мича, – бергөтис баснисö мөдөрö Ефрем. Как раз вундан кад. Бура ни воöма сюыс, вот киссьыны пондас, öддьөн колö тэрмасьны.

– А мый тэныт öддьөнсö төждисьны: öктin отирсö, сувтöтин полоса вылат – кык-куим лунөн нильöп мунас, суслонö сувтас. А вот миян кодьыс, натьтö, ягөдалан бöра. Рудзөггес шочöсь, öтик шеп эстөн, мөдик вакрамышын.

– Кокнит, Ефрем, только эд байтны, а уджавны сьökыт, батя. Ме ойсö ог узь, век думайта аслам хозяйство йылись. Колö кужны олансö ас мознат керны, колö уджавны, бура колö мыла песны.

– Сія сідз да, – шыасис ыш ловзисьөмөн Ефрем, – уджавтөг эд некин оз ов. Уджалан, уджалан тай, а сё не кийн, не кокын, кынöмыт абу пöt, а сусекын төв и гожум – торс-торс, шырлö нем сёйны.

– Ен грешит, Ефрем. Чапкы юрсит умöль думаэсö, бурö ния оз вайөтö.

– А мый, грешит коть эн грешит, сё сымда толкыс да. Но видзёт тэ ме вылө: разь ме ог уджав, али дышөтча? Син одзат эд, а лэбтисьны некыз ог вермы.

– Лоас кад, и тэныт еныс сетас тырдоз. А тэ унажыксө грешитан, душатө ассит садан... Эх тэ-э, Ефрем тэ, Ефрем!.. – Лукава эд Гаврил вуджөтис синнэсө вундиссезлань да вөджжасис, кыз ния уджалөны.

– Мыйөн сада, мыля? Ме ог сад, баита, мый эм, веськыт правда, – горөтчис Ефрем.

– Быдөнным ен увтын ветлөтам, этө оз ков вунөтны, – бордөн кызд малыштис шуис Гаврил.

– Сидз ту сидз да... Мукөдпырсяс эд кучикись петан: уджалан, уджалан, пессян отир моз жө, а сё тэнат быдлаөт куш...

– Тырмас тэныт кувсьыны, тырмас... – Гаврил кыскис табак көшельсө. – Куритыштам жө эшө да сэсса колө уджавны. – Тэчисө кыкнанныс трубка-эзаныс табаксө, өзтисө да пондисө куритны. Ефрем сэсса шы эз сет. Гаврил куритө, ачыс чуть да и видзөтө постать дорас, оз я кин сулав, оз я кин кольччы кольтанас. Казялис Ефрем Гавриллись вөджжөмсө, куритө, ачыс думайтө: «Ох тэ жила... Ен нимнас басниыс тырө, век кыв йылас ен ним, а сийө только и видзөтө, кыз не кыз бы йөз сиви вылын мунны... Син вы-всис поденщиккесө оз өшты – лёк черань... Сьөкыт, натьтө, тэныт лоас, Мирош, эжта жила ордын овны, уна лёк ойлун чулөтан...» Ефрем дёрнитыштас йөрнөссө, вештыштис бокө кучиковөй көшельсө, көда өшалис йи бердас да баитөмөн пондис мунны.

– Ыркытжык мөдө лоны, мунны колө, өктыны эшө коть кольта-мөд.

– Одьөн тай бур лоис вундыны, жарыс усис, өні только дзавскы да дзавскы – пемытөдз вунды, коть эн и веськөтчыв. – Медбөрья кыввесө Гаврил шуис горөнжык не ни Еыремыс понда, а буражыксө вундиссез понда, мед ния кылисө сылисэ энө кыввесө.

Не тэрмасьмөн сибөтчис, нильдис небо дорө шондi, купайтис ассис рыжөй тошсө Көркнеса юын, көда нюлис крут берег дорсө Сер посад весьтөт. Малалисө шондi югөррез лөнь ва вевдөрсө, окалисө зеркало кодь вывтырсө да орсисө көччезөн баддез коласын. Ырым вайөтис ва дорсянь. Көдзыт руыс көвьясис-мунис логгез кузя, лажмытіннэз кузя. Кокнитжыка ловзисис туруныс, жөв керсисө сю тылөппез, бытьтө кызд пыдына ловзисисө да сувтчисө, кокнитжыка лолалис мулөн морос. Кокнита ловзисисө и вундиссез постать дорын, Гаврил полоса вылын. Содтис бытьтө вынсө рытъявся ыркытыс, косьмис ньылөм солася-сола кеньөн вевттисьом чужөммез вылын, шондi дугис сотны юрпыдөссэз. Шупытжыка пондис ветлыны кийн чарла, казялөмөн содисө йиэз вылын кырыммез, тшөкжыка лёдззасис кольта лёдз. Но мыдзөмыс бура кылис кисоиейзын и кос весьтын – зубыта нималис-висис мыдзөм кос, орис, торйөтчис яй бердись... Шы эз вөв постать дорын – вундисө и вундисө, сапыралисө кырым-мезтыр сук сюсө. Только кылис нюдз тылөпсө вундыштөм, чарлаэзөн дзавскөм шы, кызд вөв табунлөн небыт отава вылын сөйөм.

Гаврил өні ачыс мунис нырөн постать дорын, өдззөтис бытьтө вундиссесө:

– Ох тэ, батя, кытшөм лоис бур... Шепыс нюдз, нырөн мун шуч... Мирош, эн кольччы; Мирош, постать дорас эд ужиныс... – А постать дорыс вөли не матын, эшө колис копырасьны, көстыны горб гуна гөгөр. Кокнит вөли Гавриллө быдөннысө кольны кольтаөн – кузьлун эд межаэсө меряйтис да кывнас лёбис, өні поэь өдззөтчыны да сьорас и мукөдсө кыскыны, мед и ния содтисө медбөрья выннысө да вундисө вит-квать кольтаөн унажыкөн.

Отир чукөртөны кольтаэз, клобукалөны суслоннэз. Кылөны сералөм, басниэз. Буражык лөзөтис небо, лэдзчисис мулань, өти-мөдiлаөт сылөн

пондiс пiсьтавны пидöсыс. Югьялан синнэзөн видзöтiс улö, каттис мусö пöртмасын öнөн.

А Яран му вылын оз на думыштö веськöтны горбнысö, ныр вылö усьтöдз сiя вундöтас да вöлись сувтöтас.

«Петкöтам кызкö пондöтöм постатьсö. Джыннас кольны оз позь. Тикöныс, тыдалö, пуксис ни сивиз выланис, гуддисьны пондiсö, ягöдавны. Сiйö и видзöтöны, кöр не кöр дугдöтасö, дявыв табун...» – думайтö Гаврил да нырөн мунö сё одзлань и одзлань, шентö кырымсö бöрас дугдывтöг.

– Тырмас ни, Гаврил, тырмас! – горöтiс му бокöт мунтөн Гунда Ваврей.
– Ойбыт разь мöдан вундöтны, сувтöтан эд медодзза лунас жö вундiссетö.

– Ужо, дугдам жö... Вөрö, вөрö, тэрмасьö!.. Эз ни уна коль, петкöтамö постатьсö, костi эд этö бöжсö, поди, огö жö кольö... – тэрмöтiс вундiссесö Гаврил.

– Оз ни тыдав нем, дзирс пемдiс...

– Киэзнымöс эд вундыштам...

– Чарлаэзным ныжмисö...

– Тырмас ни...

– Кольтаэз только тыртам...

Ыш ловзисьöмөн баитöны поденщиккез. Мукöдыс ныр увтас ёрдчыш-тас:

– Сквозь землю тэ мун, коссёпу голя, ойшөрöдз мөдö вундöтны...

– Мирош, Мирош, новйы жö кольтаэсö, а ми эшö кöть кольтаөн вундамö, унажыкыс сэсса эд оз и ло, кольтанас петамö постатьнаным... – баитö Яран Гаврил.

Мирош кöрталiс кольтасö, мöртiс сэтчö чарласö да пондiс новйыны кольтаэз.

– Но вот и петкöтiм постатьнымöс, – лэбтiс Гаврил медбöрья сы кырымсö, пуктiс сiйö йи вылас да кöрталiс кольтасö.

Рознитчö быдöнныт чукöртны кольтаэз. Кышöтö конувтаныт сьöкыт кольта, кыссьö шеп вундöм рудзöгпод вылöt, прощайтчö бытьтö мукöt, окалö сiйö тыра шепөн.

Лöньсисö, ланьтiсö ыббез. Богатыррезөн сулалiсö суслон лэдзез Яран полоса вылын. Вуджöрасисö морттэз: пасьтасисö, чышьянасисö, нюжötтчисö – веськötiсö мыдзöм коссэз.

Ырым вайöтыштiс кöдзыт руөн. Сайкötiс сотчöм чужöммез да сивиз.

Неылын кытöнкö бокын, улицаас, кöда кайис вөрö, кылисö голоссэз вундiссезлөн, гортö лэдзчыны сёрмиссезлөн. Нывка голос пондötiс кузь прогласа сьыланкыв, недыр мыйись сылö пондiсö отсавны эшö голос-мөд. Посад шöрас юкöвтчис, резьötiс чөлöмсö гармоння шы, кинкö чалöстiс-шутньöвтiс да пондiс сьывны гармоння увтö. Ылын-ылын, вылын возду-хас, кыйсисö эна гармоння да сьыланкыв шыэз, гыасьöмөн паськалiсö öтмөдөрö, вөрзьötiсö сьөлөм, саймötiсö чöлан посадсö, ыббесö, Көркнеса ю вевдöрсö, вöрсö...

Медбöрья морттэз лэдзчисö ыббез вылись Яран Гавриллөн вундiссез. Шы эз вöв ны коласын. Только разь буди кин чужйисяс да сун-бан, сун-бан пырötас кымöснас пемытiнсö. Мукöдыс пильс серöмтчасö и... бöра шы не төв. Мирош кыссис медбöрын, öдва лэбталiс коккесö. Öгралiс-сотчис сылөн чужöмыс, öддьөн висисö и косыс, и киэс. Сунасьöмөн тальчалiс подöна ту-ёк кузя, но учötик юрокас мичаа, югыта каттисис öтiк дума: «Чожа ме ачым лоа ни ыджыт, понда отсавны мамөлö, öбидитны некинлö ме сiйö ог сет. Мамук тэ, дона мамук!..»

6

Волостной правленнёвөлі веж миськалөм, бус көсөдз чышкөм, присутствуйн веж видзисө, свиттялісө рамаэз, көдна пытшкись видзөтисө царь чужөммез.

Кок чуннез вылын талун котрасисө и старшина, и писарь, и урядник. Асывсянь быдөнныс волостнойын: кин бумагаэзын гуддисьө, кин визитка киззесө весөтө, кин медальсө.

Талун суддэз.

Видзчисьоны земскөй начальникөс.

Видзчисьө сийө и Окульыс зоннас. Некин сылө эз вермы отсавны инька горын, некин эз мыччы паныт кисө. Ошис кытчөкө заявленнёйс, кызд ваө вөйис. Юасис, юасис – некытшөм толк эз вермы адззыны. «Мый нө керны, кин отсалас?» – думайтө Окуль. Висьталисө сылө, эм пө ыджыт начальство, көда быдөс керө по-правде, көда вермө нёкыртны старшинасө и урядниксө.

– Норась, Окуль, сылө, отсалас сия. Ыджыт сия начальствоыс, – баитө инькалө Ефрем. – Сувтас тэ дор, тальчас бөж выланыс вирьюись отирлө, горе вайөтись лөг отирлө.

Веритис я Ефрем ачыс аслас кыввезлө – сьөкыт вөлі висьтавыны. Мыйөн төдан, мый сылөн вөлі думаэзас. Только өтпыр кызкө сия ачыс кыскасис жө суддэзөттяс. Чебрень Егор ачыс кыскасис жө суддэзөттяс. Чебрень Егор одзөса понда мырддис сылись медбур мусө»Лёквожись», аснырөн көдзис, вундис – и нем эз вермы керны Ефрем. Сэк гижис судө. Дыр кыскасис сия суддэзөт, вузалис медбөрья мөссө, но сідз и өштіс мусө, нем эз вермы керны. Сэкса нь ни сылөн чорыта да пыдына бытшкисис юр вемас дума: сьөкыт кошшыны правдасө куш киён гов мортлө. Вынаыс кужөжык овны, пыдынжыка уявны оланас.

И өні, көр велөтис Окульсө норасьны земскөй начальниклө, өдва я ачыс веритис, мед эта делоись шогмис кытшөмкө буртор. Но мунны вөлісэсса некытчө, норасьны некинлө.

Локтіс Ефрем волостной правленнёө Окулькөт да Мирошкөт. Уна ни сэтчин вөлі отирыс. Пукалісө лабиччез кузя, мукөдыс сулалисө өтөрас ыбөс дынас да куритисө. Пытшкас талун куритны эз лэдзө. Шонит вөлі асылыс, мича, шондіа. Ошын увтас чивзисө чавканнэз. Улица шөрөттяс вадөрланыс баксытөн котөртис баля табун, чочком кымөрокөн колис бөраныс бус.

Өтөрас, ыбөс одзас отир баитисө:

– Лунокыс талун тай сөдз синваөн петис, – горөтчис өтік квать шуля нинкөма, чочком вещьяна пөриськодь ни морт.

– Бур, мича. Талун, натьтө, начальчтвоыс локтас ни, – шыасис мөдік.

– Оти лунө пө тай бертөм.

– Мыйнө, зэрмис да повзьөм.

– А мый сылө вадисьны, некин оз вашөт, некин оз тэрмөт...

– Ачыс аслыс хозяин.

– Ваше благородие...

– Сия сідз да... Эмось жө, поди, эшө сысса гырисьжык начальниккес?

– А кытчө сэсса мян кодыс мунан? Эд и туйсө он адззы... – горөтчис көдакө палисадник дорас.

Мирош мамыскөт сэтөн жө сулалисө да кывзисө отирыслись басниэсө. Мирош мывкыда синнэзөн видзөтис баитиссез вылө да некыз эз вермы вежөртны, кытшөм начальство йылись баитисө мужиккес. Төдіс сия только старшинаөс да урядникөс, көднө синнас эз вермы адззыны. Дзар керис уличаланыс – котөртө волостной сторож да өвтчө киззнас. Кызд воробейез кайварыш одзын паймыштісө отир. Одзлань быдөнныс төдісө – локтө сия амбаррезланысян виль юөррезөн. Отир уськөтчисө сылө паныт.

– Локтö?

– Локтö!

– Кытöн ни?

– Кытшöм вöввезöн?

– Параöн? Тройкаöн?

– Смоль кодь воронöй вöввез... Тройкаöн! – сувтчыштіс сторож, чапкыштіс энö кыввесö да уськөтчис волостнöйö, веськыта присутствоö, старшина дынö:

– Елизар Тихонович, локтö! Пантавны пет, матын ни!

– Локтö? – öшисмоз старшина, швырк кыскис кармансис медальсö, кышалö бы, кышалö сійö голяас, некыз оз письты.

– Амбар воротаас нги пырисö! – сторож малыштіс көч бөж кодь тошоксö да уйыштіс ыбöсас. Писарь кыш-паш öктыштіс бумагаэсö – да пызанö. Ударник кышыштіс шашкасö да сторожыс сьөрö. Сыбöрын старшинаыс писарькөт шупыта петисö öтөрö.

Пельöс сайсяняс, кытöн сулаліс кыксувда керкуыс лесничöйлөн, мыччисис воронöй вöввеза тройка. Отирыс, көдна пукалісö, кызд öбедняö ыджыт колоколнас вачкөм бöрын, сувтыштісö кок вылö, юкөвтчисö ыбöс дынсис и посöдзсис öтмөдөрö. Крута эд вöввес бергөтчыштісö да чушыктөмөн сувтісö посöдз одзас. Урядник, старшина да писарь сибөтчисö фазтон* дынаса вдруг, кызд пуовöй солдатоккез лабич дорын, копыртчыштісö.

Отир сулалісö – шы не төв.

Чеччис невылын мыгöра, свиттялан кизя, сьöd пальтоа морток. Фуражка одзас кокардаокыс югьялыштіс, кызд звездаок. Пöриськодь ни вöлі земскöй начальникыс, дзор, ёся тошокыс лён содзöн тыртіс тшöкасö, золотöй асыка очкиэз сайись тыдалісö лэчыт синоккез. Чеччис да шы эз сет, питькыр-питькыр пырис волостнöй правленнö. Сы сьөрö – быдөнныс. Ыджыт волостнöй жырыс тырис отирөн. Баитісö гусьөнмоз, эз позь вежөртны басниэсö. Быдөн видзөтыштіс присутстволань, кытчö пырис локтөм мортыс.

«Кеньжак кодь эд то, некытчö ровно и кукушкаöн тапкыны, а видзөт тэ, кызд полöны – начальство, öтік кокардасис полөм петö. Ох, бöра и сюрас жö талун беднöй йөз чижовкаэзас, уна колас мукөдлö туйсö тальны эта учөтик мортоксянь», уна колас мукөдлö туйсö тальны эта учөтик мортоксянь», – пукалö Öкуль бокын Ефрем да думайтö, ачыс нырыштсьöма гыр-дзаэзнас пидзөссэз вылас да öшөтöма юрсö.

Öкуль юрын каттисьöны мөдік думаэз: «Вежöра тай чужөм вылас, отсалас жö, поди, ли мый ли... Висьтала быдös, кызд вöлі, ась вöлись Сюлепеткосö судитöны, пон род, вежөм кучик... Только веритасö я Мирошкоыслö? Ozö кө веритö, дак сэк нем он вермы керны...» – Кокньөтісö невна эна думаэс Öкульсö, мичаа видзөтісö сылөн синнэс, видзөтісö присутстволаняс жö, кытöн вöлш отсалісьыс, сія мортыс, көда вермö керны унатор.

И Мирошлөн шупыт бабыввезöн каттистсö учөтик юрокас гырись думаэз. Пукаліс сія мамыс бокын öшын косяк дорас, видзөтіс öтöрас, кытöн воробей табуныс шуксис улица шöрас, да думайтіс: «Нырыс кайварышлөн кодь, сшдз и видзөтö саныштны. Ме сэтшöм нырресö ог радейт...» Дзар керис öшынас – воробей табун коласас чарньөлөн лэдзчисис кайварыш пиян, сапырнитіс öтік воробейös коккез коласас, саныштіс юрас да лэбтісис кымöрас.

* Фазтон – кокнитик коляска.

«То этадз жö öнi пондас санны эта мортис отирсö. Судья пö эд сiя, шуö мамаö, пондас пö отирсö судитны, быдöннысö пуксьöтас чижовкаö, пемытiнас...» – думайтыштiс бöра Мирош.

...Суддэз пондöтчисö. Гöрд суконной пызандöраа пызан сайын пукалiс земскöй начаьник, веськыт кинас веськöтыштлис ныр вывсис очкиэсö да видзöтiс гижöттэз вылö, а сыбöрын отирыс вылö и кытсалiс фамиллээз да ниммез.

И локтiсö пызан одзö отир копытчöмön, пессян сьöлöмön, локтiсö арся кымöррезön, пемытöсь, бледöсь, пашмöм юраöсь. И керис эта учöтик мортокыс ыджыт удж: кинöс чижовкаö месяц кежö, кинöс годддын кежö, кинöс год кежö тюрьмаö... Öтiклö:

– Тэ гусялöмыт графыс вöрись нин, мынтны штраф дас руб...

Мöдiклö:

– Тэ, порсь чужöм, лысьтан паныт старшинаыслö горавлыны, тэ, нятьöсь чужöм!.. – öярк да ярк мужикыс вылö, гым да гым кулакнас пызан кузяс... – Пуксьöтны сiйö месяц кежö чижовкаö!..

Куимöтлö:

– Ыджытön асьтö пуктан, некинöс он мöд тöдны, губернатор йылись баитан, царь йылись... Эх-х тэ, зырым!.. Крамольничайтны мöдан, сiя туй кузя мунны?! Варнак! Öштöмыт ловтö – ловтöм морт! Век тэныт тюрьмаын сiсьмыны!.. Куим год кежö тюрьмаö!..

И былъ – киö кызд лякötiсö пуктiсö Мирошлön думаэс. Учöтик мортокыс кокалiс отирсö, кызд кайварыш. Баитiс не тэрмасьöмön, ольсалiс небыта, только чорыт вöли узыны. Баитiс, кызд рассказ лыддьöтiс, только көр лөгасис, дак сэк кельдöтлiс буражык, пондас вöрны улiсь тырпыс, кöда вöли öшöтчöма куканёк вöраön, да тшöкжыка веськыт кинас павкötчылис очки асык дердас.

Мирош пукалiс, уна эз вежöрт, мый сы одзын керсьö, умöля сiя тöдiс рочнас (а земскöй начальникыс баитiс рочön), юасис мукöдсö гусьön мамыслiсь. Адззис, кызд пызан дынсис мунiсö отирыс эшö буражык юррезнысö öшöтöмön... Кызд мукöдсö сэтön жö суйыштитiсö пемытiнö, мукöдыс пöрччалiсö коссиныс көшеллезнысö да чожжык кыскисö деньга мынтыны штраффесö.

Зубыта шырисö отирсö эта учöтик, ем сина мортоклön кыввес. Весь сылön етша горötчиссис öтик кыв. Быд кылыс сылön отирыслiсь лэчыт пуртön вундыштiс сьöлöм. Уна отир кымöра думаэзön петiсö волостной правленнёись, уна деньга колисö медбöрья судыс. Öкуль сибötчис аслас мөгön земскöй начальник дынö.

– Тэныт мый? – ласковмоза юалiс сылiсь учöтик мортокыс.

Öкульсö эшö сы дынö сибötчытöдз велötiсö, мед сiя пондötiс «ваше благородие» кыввезön. Сiдз сiя и керис:

– Ваше благородие... – горötчис сiя. Сэссия бытьтö виньдiс, горшас кайö кытшöмкö тшакыль, оз лэдз лолыштны не баитны. Дульсö ньылалöм бöрын бöра шыасис:

– Ваше благородие... Ме... Менö... Чебрень Егорыс...

– Висьтав бытшöмика, эн мыктав, нем ог вежöрт, – бöра, кызд виа бордön малыштiс, шуис земскöй начальник. Аслас шупыта котрасисö синнэс, бичиррезön койисö лөг дзаркерöммез Öкульыслань да Митрошыслань. Тöдчис: орсö сiя кыввезнас Öкулькöt, кызд кань шыркöt. А Öкуль раджык сьöлöмön ни эна кыввез бöрын смевжыка пондiс висьтасьны:

– Богатинаыс, Чебрень Егорыс, Стречалун лунö мый понда и кышасис ме вылö... Мый йöзыслiсь повны – висьтала эстön тэ одзын, ваше благородие, – насильничайтитiсö менö урядникыскöt...

– Кинкө-ө-өт? – лөгөн чикыртыштіс синнэсө учөтик мортокыс да мөдпөв юалис Окульыслісь.

– Вон тай, урядникыскөт... өнджа...

– Кинкөт, кинкө-өт? Чорыта да лөгөн өмаліс висьтасисьсө учөтик морток. Ачыс кызд ем йыввезөн татшкисис дзуз видзан синоккезнас ласков да югыт окуль синнэзө. – Тэ мый?.. Тэ кытөн?.. Тэ кинкөт баитан? Тэ кин йылісь сі дз ьаитан, а?.. – пондіс горөтлыны земскөй начальник. Ачыс гым да гым сөтө кулакнас пызан кузя, ярк да ярк тапнитө кокнас.

Окуль өшис... Эз сія видзчись начальствосьянь, мед панталісө сэтшөм кыввезөн. Оз сэсса письты өтік кыв горөтчыны, жмитіс зоныслісь кисө, ачыс петитчө бөр-бөр.

А учөтик морток горөтліс, сөйис көин синнэзөн:

– Урядниклө паныт?! Мөдан сійө катгыны умөльнас? Порсь! Порсь! Нятыын чужөм!.. Тэ мый, вунөтін: кинөс сэрпөсьтан, а? Талун кутчисин урядник бердө, ашын пристав бердө, а мөдлун эшө ылөжык пондан мунны, а? Кин тэнө эна кыввезө велөтіс, ноко висьтав, кин? – Сія петіс ни пызан сайсис да сідз пондіс ряксыны Окуль вылын.

Отырыс вешшисө пызан дынісь матөжык ыбөслаяс, мукөдыс, шапканысө конувтө дзебөмөн, петісө ыбөс сайө.

Урядник, кызд муө мөртөм стожар, сулаліс земскөй начальникыс бөрын, өт кинас видзсис шашка бердас. Сія шы эз сет, но боксянь позис казьяны, кызд сійө бордалісө яркайтісь мортлөн кыввес.

– Сюлепеткин! – горөтіс земскөй начальник да бергөтыштіс урядникыслань юрсө. Урядник дрөгнитыштіс да нюжөтчис эшө буражык, оз и вөрзөтышт чунь понөн, сулалө, кызд кулөм, только синнэзнас кваркышалыштлө.

– Тэнат эта мый, а? – лөга баитіс одзлань лөга морток. – Вельмөмась баляэт, малыштны колө көть өтпырись зубытжыка гөн паныт! Кылін? Быд зырымыс лысьтө горавлыны, эта көрсянь сідз лоис! Сюлепеткин?!

– Кывза, ваше благородие!..

– Не кывзыны колө, а уджавны! Тэ урядник, тэ власть! Треситны колө этө бытшкасян өгсө өті-мөді юррезісь! Кылін?

– Кылі, ваше благородие!

– Не кывзыны колө, а уджавны!.. Вужсорнас летны эттшөм басниэсө!..

А Окуль эна басниэс коста бөрөн да бөрөн вешшис отырыс коласө, өштөтчис земскөй начальникыс синнэз одзись.

Гөгөр шы не төв. Отырыс паймис, нельки полөмөн лолалөны, мөртөмась тошшезнысө мулань.

– Вайөтө вөввез! – горөтіс земскөй начальник. Старшина писарькөт кызд он вылісь саймисө – кыкнанныс друг чеччөвтисө пызан сайись да уськөтчисө ыбөсө.

Земскөй начальник пырис присутствоө да пондіс пасьтасьяны. Сюлепеткин руч моз котрасис сы гөгөр, чышкис начальствоыс фуражка вылісь буссө, весөтіс чышьянокөн кокардасө.

– И кызд тэнө оз кезөт катгисьяны эттшөм нятьөссескөт... Кушман дукөн эд только ны дынісь и вайөтө... – шыннялөмөн ни да синнэсө куньыштөмөн шуис земскөй начальник.

– Кодкодь вөлі, ваше благородие... А садь юрөн бы и матө эг сибөтчы, и вөтын эг вөтась...

– Етшажык ю, кылін? Да синтө лэчытжыка видз! – петтөнныс ни горөтчис учөтик морток. – Годдэс лоисө сьөкытжыкөсь... Уджав сідз, мед то кытөн тэнат быдөнныс вөлісө... – сія пидзыртіс кулаксө да лэбтіс урядникыс чужөм одзө. – А чуть мый, юөрт менө сы коста жө.

Отырыс сулалісö посөдзас, бокынмоз тройка вөлөн сулалан телега дынсяняс. Окуль муніс палисадник саяс да сэтчинсянь видзөтіс ассис «дорйисьсö», кöда сідз жö не тэрмасьомөн пуксис телегаö, кыздз не тэрмасьомөн чеччис локтөнняяс. Сідз жö сы гөгөр каттисисö урядник, старшина да писарь.

Ямщик горөтіс вөввез вылө. Тройка чепөссис местасис, сильнитісö сильканнэз, гымнитісö посок вылөт телега круггез... Удав рысьөн саясис пельөс сайö, мөдік улицаö, тройка вөв, бытьтö кыздз тэрмасис кыскыны этö зубыта, сьöөлөмөдз пыран жельсö, кöда, кыздз кайварыш воробейез коласö, уськөтчыліс ны посадö да кокыштіс морт-мөдөс, сөйис аслас ем йыла синнэзөн.

Окуль видзөтіс сылань, кытчö саясисö вөввез. Видзөтіс да думайтіс сы йылісь, кытісь эшö сылө, кыздз кошшыны правдасö, сійö правдасö, кöдаын сылө эшö веритіс көть öтік сьöлөм пельөсок. «Ой тай, тыдалö, начальствоыскөт ёртась правдаыс, быдөнныс ншя керöны öтдор, быдөнныс сулалöны öтамөд понда. Нем нысянь видзчисьны бурсö...» Сэтшөм думаэзөн сія кольлаліс мунісь мортсö, кöда вылө надейтчис, и кыздз öні сылөн надейтчöмыс люкасис эта учөтик морт вылө да паськаліс шөрвожөн, сідз жö, кыздз зэр одзын ыджыт пурга-падера летö-вотö сьод да кыз кымөрресö.

– Мам, мунам... – шыасис бокас Мирош, кöда букышөн видзөтіс сылань жö, пельөс сайланяс, да лөгөн содтіс:

– Оз сія отсав тэныт, Чебрень Егорыс дор көстö...

Шы эз сет Окуль зоныслö. Эна минутаэзö сылөн изсяліс сьöлөмыс, но эз пичкись синсис öтік синва воть. Югыта сотчисö синнэс, öгралісö биа шоммезөн... Усисö төдвылас думаэз: «Вежөра тай... То тай кыздз отсаліс, бур кывсö мыччис, ласкова горөтчис...» И эна минутаэзö позис лыддьыны öргалан синнэзісь быдөс, мый думайтіс Окуль.

А луныс вөлі сэтшөм жö гажа да мича. Рытьяв кад ни. Лоис ыркытжык. Мыдзөм шонді мышкыртіс юрсö вөрлань, бытьтö мыдзөм богатырь кошшис шоччисянін эна лөз кудриа паськыт вөрреза ольпась вылын.

Лунланяс мыччисисö борда кымөрөккес, нія уйисö жагвыв и купайтчисö золотöй шонді югöрын, кыздз дзодзог типпез вы гөпын ведра понісь кисьтөм крут зэр бöрын...

7

Казявтөг чулаліс уджын, пессьöмын да шонді вылын жаритчöмын шоньт мороса, конечтөм луннэза гожум. Кушамисö ыббез, вөйсасисö ю сайын öтамөд сайсянь турун зорөддэз, лентяйтіс вöрыс, сулаліс пасьтөм багайөн. Лэчыт ойтöлыс увгөмөн сыналіс сійö лист сорнас, гусяліс медбөрья рөмсö.

Ар... Сера пятноөн сулалö Сер посад. Асыввезнас кынтö, вевттö мусö чочком пужөн. Только юыс торйөн аскодя рөмөн виклясьö видззез кузя. Котөртö Көркнеса ю, бульөтö, өктö ва пыдөссис изоккесö öтамөдкөт. Но зэррез абуөсь. Көс таво сулалö арыс, эз вермы керны нятьсö, сійөн сія кыздкө эз вачкись быд кодсья ар вылө.

Иньпөлөс тэрмасьöны керны лён. Дзуртöны баняэз дынын нярьяннэз, шовкөтöны пыркөтчаннэз. Сёр рытөдз баняэзын кылöны гора сьыланкыввез, пикөтöны гармонняэз – нывкаэз өксьöмась пукавны, а том зоннэз локтөмась нійö гажөтны, чулөтны кадсö.

Мирош ниртіс-уджаліс Яран пиян ордын, песіс том высинсö, кытөн сія судзис и эз судз. Оліс көр тшыг, көр пөт, – унажыксö вердісö лөг кылөн да кукушка сорөн. Только Öльөкыс, Гаврилыслөн зоныс, мукөдпырсяс лас-

ковжыка байтліс Мирошкөт, мыччавліс ассис книгасө, велөтіс, кызд кытшөм буква колө төдны, кызд ныись шогмөны кыввез.

Локтіс кызкө өтпыр зонкаиньой мамыс дынө, көда сідз и кольччис овны Ефрем ордын, норасьө-висьтасьө аслас олөм йылісь, кытшөм ойлунсө чулөтөмыс йөз кусөк дорын.

Окуль малыштис сылісь съөд юрсисө да ласкова горөтчис:

– Велөтчы только, дона зониньой, буражык удж бердө да быдмы чожажык, быдмы, сэк ачит пондан буражык адззыны олан туйсө, казялан, кыт мунны да кызд мунны.

Шынь серөмтчис Мирош, вунөтіс эна минутаэзө быдөс лөксө да съөкытсө, чорыта и былньоя горөтчис паныт мамыслө:

– Чөв, мама, лоа ыджытжык, сэк миянлө лоас кокнитжык, сэк менө цепөн он кыскы Чебрень пияннэз да Яран пияннэз керкуө. Не ныкөт миян туйыс.

И басниыт эд тэнат то кызд ыджыт мортлөн, – шыасис сэтчө Ефрем, – одз тэнат мөдөны оссьыны синнэт, только вот велөтчыны бы колө, Мирош, годдэт эд чулалөны. Мөйму бы эшө коліс мунны школаө, а Гаврил и байтны оз лэдз велөтчөм йылісь.

– Кытшөм ни, Ефремушко, велөтчөм, – ыш ловзисис өкуль, – юрсө нө мыйөн пондас питайтны? Ась ни уджалө, кызкө, поди, олас и сідз...

– Оддьөн эд умөль велөтчытөм мортыслө, пөдана сылө туйыс, синтөммоз олө сэтшөм мортыс.

И сэк Мирош бура гажөтіс мамыслісь съөлөмсө:

– Мамук, ме мукөд букваэсө эд төда ни, таво вөлісь размөд киам сюрліс книгаыс, висьталіс меным букваэсө Ольоқыс. Кынымкө кыв ни велөті, только съөкыта ния пырөны юрө – ог вежөрт роч кыввесө.

– Мый тэ, забыль? Радьялөмөн мамыс жмитіс морос бердас да пыма окыштіс зонсө.

– Велөтчы, Мирош, велөтчы, кызкө көть Ольоқыс сайсянь да велөтчы, – байтө сылө Ефрем.

– Рыттэзнас мукөдпырсяс гусьөн лыддьөтамө, – шуө Мирош. – А казялас көр айыс, дак лэбтісяс видчыны, йывдө өтлаын и зонсө, а меным торскас юр кузам да горөтас:

– «Мун, зырымөсь грамотей, юктав вөввесө, эн енөвтлы уджтө, эн суй юртө, кытчө оз ков. Онджа... мирскөй-немирскөй, эшө бы кытшөмкө книга тэныт... Көзды жө, ов, вердөны кө няньнас дак...» Сідз и велөтчам гусьөн.

Сэсса зонкаыт кватитчис, чеччөвтис мамыс морос одзись, кватитис кепись-шапкасө да горөтчис:

– Ой, вунөті эд тіянкөт пукавтөн, хозяйнө тшөктис йики лэдзчөтны... Но, мамук, адззисьлам бөра ужо, пырала...

И рад съөлөмөн котөртис гуна вылө

Өтпыр кызкө, төв пуксьөм бөрас ни, Яран Гавриллөн вартисө. Көдзыт вөлі асылыс, чепляліс мороз, шупытжыка тшөктис вөрны отирсө.

Вартөм бөрас быдөнныс лэдзчисө гортаныс, а Мирошсө да Ольоксө Гаврил коліс гуна вылас, лэдзчытөнныс сия закажитис:

– Вөввесө видзөтлө, мед стайкачис ворох дынас эз петө, а ме котрася гортө, инькаэс мешөккесө кайөтны вунөтөмась.

Кык өткодь петисө гунаись да котөртисө идзас стопа вылө пессьыны. Бур быглясьны свежөй идзас вылас! Овин тшын дукөн сия вачкө нырө, пух кодь небыт да веж – сөстөм!

Мошкоритчөны Мирош да Ольок идзас стопа вылын, личкөны өтамөднысө, берездасьөмөн тарөвтчөны улө... Сыбөрын бөра кыссьөны, одзасьөмөн кайөны стопа вылө. Чожа нийө морозыс оз шымырт – жаралісө кыкнанныс, пар только дынсиныс кайө, кызд варттөнныс жө.

Бобавтөнныныс сідз ния вөввес йылісь и вунөтісө.

А Сивкоыс, кōда Гаврил быдтіс ачыс да ветлө вөлісь куимөт год, кызкө чапкōма серөмтчө, петōма стайкасис да инмōма гуна долонь вылас – сю ворох дынас, да ножө сөйны рудзөгсө.

Эз и казялө челядь, кōр пырис гуна долонь вылө Сивко, кōр кайис Гаврилыс мешөккезнас.

Вөлісь ряксөмсө кылөм бōрын ния өвсисө, усисө тōдвылын вөввез – котōртісө гуналань.

– Ах тийө, лешакпияннэз, сідз ноко караулитіт? Виятө эд ті менчим медбур вөлөс, а? – пондас горөтлыны лөкгоршөн Гаврил.

Паймисө зонкаэз.

Гаврил кватитіс зонсө киөттяс, өбыртіс сылө кулакнас спинаас, пуксьөтіс вөв вылас да горөтіс:

– Гōняйт чожажык! Вашөтлы вөвсө пымавтөдззас улицаэз кузя... Вашөт!..

Сыбōрын видчөмөн бергөтчис, кватитіс юрсиөттяс Мирошсө да пондіс пөвсавны-шулявны кучиковөй чересседельникөн.

Вартліс лөгөн, пиннесө жекыртөмөн, видчөмөн:

– Велөтчы, мирскөй чужөм, велөтчы уджавны, покорень тай тэ, лешакпиян тэ, вельмөмыт! Вөввесө ни он куж дозирайтны, абыз тэ!..

Вартліс, вартліс – мыдзтөдззас, сыбōрын табанитіс Мирошлө лөнас. Зонкаыт сунбанасьөмөн усис вөв стайкаас.

Недыр мыйись гōняйтөмөн локтіс Ольөк да сувтөтіс вөвсө. Айыс бобгөмөн петіс гунасис да дыр поводөн новйөтіс вөвсө, сыбōрын пыртіс сийө стайкаө.

– Мун сэтись, туй вывсис, – лөгөн горөтіс сия Мирошлө. – Паськөтө өнсө да куралө сэтчө жугсө.

Мирош сыркьялөмөн чеччис да муніс уджавны. Мый эд керан: жалейтны некинлө, норасьны сідз жө. Горзіс, горзіс, өштіс ас вылас жө забедасө, мыля шогмōма сэтшөм несчастнөй часө, да кутчисис уджавны.

Эта вартлөмыс пыдына пырис Мирош вемө, дыр кежө кольччис сэтчин, тавроөн лякасис вем бердас век кежө.

Көтө и видисө сийө книгаэзись, сюрліс эта понда не өтпырись и Ольөклө, но пыр – чуть только проста кад – Мирош пукалө Ольөк бокын, новйөтө чуньнас строчкаись строчкаө да мыкталөмөн нюжлалө, лыддьөтө букварись тōдтөм кыввез. Уна оз вежөрт, уна оз лок сьөлөмөдззас, а книга лыддьөтны кыскө. Перво өддьөн вөлі диво, кыздэ эна чукыля-викыля кырөлоккезись, воротаэзись шогмōны кыввез.

Мырсис, мырсис и велалис эд – пондіс лыддьөтны.

* * *

Локтіс төвся кузь праздник – Розосво. Бура праздниксө видзчисьө коми морт. Видз бōрын петө уллюн. Быдөн стряпайтө, керōны брагаэз, суррез, быдса кык недель гажөтчөны, сьылōны, орсōны, йөктōны, пируйтōны...

Көдзытөсь сулалісө луннэз, тшынморозаөсь. Көс картошка пизьөн дзуртө кок увтын лымыс, бичирасьө сия син одзын төлісь увтас.

Етша эттшөм ойезнас казялан өткаса мортөс, только разь, буди, смевжыкыс лысьтас петны өтікөн да и сия мунө улицаэз шөрөт дзарьясьөмөн. Сэтшөм пө өні кад – ворота туйө инман юкмөс дорө, керку ыбөс туйө – баня ыбөсө, кытөн олōны сюра-пеля учөтик мортоккез.

Сулалө светтө...

Коми морт бура веритö чуддэзлö да суседкоэзлö, куллезлö да вöриссезлö.

Том отир öксöны ворожитчыны, маскируйтчыны, кывзисьны. Перво рытсаяс ворожитчасö: дыр вöйсаясö зеркалоэз одзын, замокаласö юкмöссэз, дыр изгилайтчасö курöг да петух вылын, а көр пондас сибавны ойшөр, сэк босьтасö ен, гормötчан и петöны кывзисьны.

Параэон петöм йылись и думайтны оз позь – öтик морт артелись сё ни кытчöкö öшас, кругсис сийö чуддэс вермасö кыскыны да нуötны кытчöкö вакрамешö. Сийöн кывзисьны петöны непременно сідз, мед öтик морт вöли паратöм.

Петасö öтөрö, шушкötчыштасö, баитасö, кытчö пуксьыны, да быдöнныс öтик следöt пырасö лымас. Сэссия гормötчаннас чертитчасö, сийö да енсö пуктасö пыран следдэз вылас да пуксясö кекеркаөн кывзисьны. Пукалöны быдöнныс, кыздз тюгуйез, асьныс чужöмнысö вевттасö киэзнаныс. И пуксьöны быдöнныс чертитöмланьö бөрөн, пуксян кө мöднöж – кругсис, кыздз вугырөн, сапырнитасö да кыскасö сэтчин, кытөн жаритöны дзирдалöм сковородаэз вылын.

Дыр пукаласö сідз кекеркаөн. Сэссия пöрисьжыкыс колассиныс лэбтас юрсö да кытсöвтас мукöдсö.

– Но, мый кылись? – юасьö öтик.

– Гуж-важ-ж кылö пöввез лэдзисö, – шушкыштас полöмөн мöдик.

– Не на эд, силькан шы тай кылись, – тэрмасьö висьтаваны куимöt.

– Мыся тиянлö силькан шы. Дзавскис кылö кинкö вундiс чарлаөн, – öмались нийö нельöт.

– Не, батя, гужнитöмсö жö ме кыли. Эшö сыбöрын лöсьйисьны пондiсö, – отсалö первöйыслö витöt, көть ачыс и нем эз кыв, а пыр пишкис тырöм нырнас, көда зилькьялис насмокасянь.

Дыр споритасö кывзiссез эшö чертасис петтöдз жö: öтик кылöм öтикö, мöдик – мöдикö, куимöt – куимötö... Споритöм бöрын сэссия локтасö öтик кылöдз да сідз и висьталасö: кылись пöввезөн гужötтöм – эстөн керкуас таво лоас покойник.

Сэся петасö да шымырөн, дзуртöмөн мунасö мöдиклаö, одзаныс оськалöны енөн да гормötчанөн.

Бöра пуксисö. Пукалöны, жагвыв чушыктöны – шы не тöv. Чеччасö, споритасö-керасö, локтасö öтик кылöдз – кылись вндöм шы: эта урожай одзын. Сильканнэз – свадьба одзын, ведраэзон жольötтöм – пожар одзын.

И ветлötасö сідз час кык-куим кыным, кытчöдз быдöнныс оз гöжö, – сэк вöлись котөрөн, оча ки вартöмөн пырасö керкуö.

А тöлисьыс вылисянь шиньялö, нийö сералö, сереброа гöглянөн тарöвтчö сьöд бекöра, чочком точкаа небо кузя да кельыда кисьтö югытсö бисерөн югьялан лым вылö.

И мыйсö эд мян коми морт оз кер Розосвося кадö, мыйö только сiя оз верит, кинöс только оз кор дынас, кинлö только оз кеймись сы понда, медсетiсö сылö кокнитжык да буржык олансö.

Мукöд смевжык морттэз лэдзчöны кывзисьны нельки юкмöс дорö. Этö чуддэскöt мед ни полöм петана ёртасьöм. Сідзжö ойшөрнас босьтасö сьöраныс гормötчан, ен да мöс кучик и ышки-пойки, пернапасасьтöг, но думананыс ен нимөн, оськалöны юкмöс дорö. Лэдзчасö, ольсаласö кучиксö, бытшöмика чертитчасö да пуксясö сідз жö кекеркаөн, чужöмнаныс быдöнныс юкмöслаяс. А кучик бöжсö лэдзасö юкмöсас. Ловйөн не кольчыны быдöнныслö, кыздз мый неладно. Сідз и тöд – быдöннысö кульпияннэс кыскасö юкмöсö. Сийöн быдöнныс пукалöны не кулöмöсь не ловьяöсь, көть и бура тöдöны, что быдöс, кыт колö, кресталисö, чертитiсö и пернаэзнысö морос берданыс жмитiсö.

Юкмөс дорын пө көть мый бы эн завечайт – быдөс кыз ки долонь вылө пуктас, висьталас. Только кості чечыны капли оз позь. Пукав гажтөдз, но эн вөрзьөтчы. Пондас увтат кучикыс вөрны – эн вөрзьөтчы. Пондасө бөжөттяс кыскыны – эн и кваркыш кер. Енсө да гормөтчансө вөрзьөтны оз лысьтө. Но только осьт синнэз – ловыт өмөттят каек швырк только петас, сымда и адзылан, сымда тэнат и вөлі олөмыс...

Няр сьөлөма мортөс кывзисьны юкмөс дорө некөр оз босьтө.

– А мый тэ, батя, не повны дак полан, көр кучик бөжөттяс сідз и летөны – кыскөны учөтиккес, – баитө мукөд көч родісь мортыс, көть ачыс эшө өтпыр эз и вөтөн вөтасьлы пуксьыны юкмөс дорө.

А мед ни полана кадыс светтөись – Крещеннө паныт да Крещеннө асылыс. Сэк пө чуддэз сідз кок увтө и пырөны, сэк ветлөт дзарьясьөмөн. Чуть только джөмдін – чуд пырис ни кок увтат, сэтөн сія падежыт и каттисьө... Крещеннө панытө быдөс керку ыбөссэз, өшыннэз, воротаэз, гид ыбөссэз и гу ыбөссэз кресталөны мелөн. Важся эта поверьёис коми мортлөн, сідз сія и мунө годісь годө, векісь векө. Колян кө креставтөг – тапкияс покасьыт, пырас тыр, сыбөрын сійө и зырөн он вермы зыртны. Кольччө креставтөг только өтнас баня ыбөс. Сія пө, баняыс, сулалө сэрпөсинын и немлө сэтчө пуктыны ен нимсө. Некытшөм ен ним оз видз пырны чудөс баняө, көть кыз крестась, сө ни кыткө щелөкөт кыссяс да поздіяс полөк увтө. Сідз мян коми морт и төдө – баняө өтнат ой кежө эн енөвтчы, гажтөм лоас узыны. Да ыджыт спасибо висьтав, кыз ловйөн сайман, а ойнас пө баняис петны ыбөссө некөр он адззы – ыбөс туюс ружтөмөн горө пыран, өшын туйө – полөк увтө татшкисян, и сэтчин кыккусінь көстасө да сідз сэсся и пикнитны он вермы.

А Крещеннө луно только вунөт горвыв шөрө брага да коль сійө осьтөн – сідз и төд: чудыс пыралас гывьясьны. Брага пагырмас, юикө кезөтө – помой не помой, кыссьө кыз въздрень... Пов сідз только өбедняөдз. А кыз пондисө тонгыны-звонитны өбедня дорө, сэк быдөс, мымда посадын эмось вөввез, петөны тальны чуддэзөс.

И гөняйтөны сьөрсьөн-бөрсьөн улицаэз кузя, уйзөны-айзөны, кульөны нагайкаэзөн вөв боккез. Вашөтлөны сэтчөдз, кытчөдз вөввез оз быгсялө. Кымөрөн кайө вөв кок увтись лым бусыс, шерөн резсьөны коколлез, ордчөны өтамөд вылө вөввез, одзасьөны, зурасьөны... Сідз тальөны чуддэз. И некытчө нылө сэк лоө воштисьны – котөртөны быдөнныс вадөрө да уськөтчөны юкмөсө.

Сэсся өбедня бөрын попpez еннэзөн лэдзчасө юкмөс дорө, тульөтасө юкмөсын крест, игналасө этөн юкмөссө, и сэк чуддэзлө бөр туй абу. Олөны ния йы увтын тулысөдз.

Розосво уна вайөтө сідзжө и гажсө. Вайөтө пөрисселө и томмезлө.

Но кин оз төд, кин оз касьтышт Розосвося орсаніннэз! Мымда эд сэтөн том отирлөн гажыс, серөмыс, окасьөмыс да любитөмыс!.. И мымыда этөн окасьөмнас вайө быдкодь шөгсө эта праздник Розосво!..

Мукөд пөрись морт, көдалөн лөн содзөн ни дзардө дзор тошыс, швачшвач куш плеша юрпыдөсыс, – а сө эшө шыннялөмөн касьтыштлө Розосвося орсаніннэсө:

– Гуляйтыштім, көр ния вунасө Розосвося орсаніннэз. Сэк ме и сапырниті пемытінас вон тай сійө, чуп өтпыр окышті да кыв-мөд бытьтө лёбышті, а сія и бөбасис... – ачыс мыччалө старухаыс вылө, көда каттисьө мыйкө челядьыскөт комас.

Только ештас пемдыны – чукөртчөны том ныввез да зоннэз креста туй вылө. Нем нійө оз видз гортын – көть бимороз, көть лэбтісяс падера да син не бан оз тыдав.

Гажыс сэтөн мымда, серөмыс кыз нысянь койо конечтот том выныс, кодо некөр оз позь видзны, немөн! Нюжвыла орсө гармоньщик, пиньласьомөн нюжалө мех, питиривайтоны голоссэз, бобгоны бассэз... Кылө походной. А гармоння бөрсянь паськалө, нёжыника ольсассьо өтмөдөрө сьыланкыв. Уна өтик өмись сьылөны том ныввез. Сьылөны кык голосөн: өтиккез вөснита лэбтоны вылө, а мөдиккез кызжыка, кызд мошшез, нюжөтоны бөрсяняныс. И кытшөмкө аскодя прогласа сьыланкыв паськыта өшалө воздухын.

Мукөдыс гуляйтөны параэзөн, ыжмитчөны өтамөд бердө, шушкөны шонит, ласков кыввез, көдна, кызд морозыс пырө пась увтө, сідз жө йиджөны сьөлөмөдз. Челядьыс сэтөн жө котрасьөны өтлаын гыриссезкөт, орсөны «коровкаөн», туплясьөны лымас, кытшлалөны сьыліссез гөгөр, мед покорень не гөжны.

Но то, локтисө бокись улицасьяс кык ныв да зон. Ния ветлісө юасьны, кытчө бы нийө лэдзисө орсны. Пырисө отирыс чукөрө да висьталисө, кытись адззисө керкусө. И сэк быдөс эта отир чукөрыс, а ныкөт өтлаын и кашкавдаыс, сьылөмөн пондісө мунны орсаніно.

Көдзытсорөн пырисө керкуө, нывкаэз быдөнныс чөвтчисө, паськөммез тэчисө комас да сувтисө кругө. Зонкаэз пуксисө лабиччезө, западня вылө. Пиксөны гармоння шыэз. Поснитжык челядьыс кайисө гөбеч дорө да пөлатьө.

И пондөтчис орсөм...

Паськыта мунө кругыс, пеллез чанөтө сьыланкыв. Мича ныввез быдөнныс мөдөтчөмась быдкодь рөма сарафаннэзө, дубассэзө, потшалоккезаөсь, гарусной йиаөсь, пристежаөсь, серөтом йөрнөсаөсь. Кызд ловья читкыля кыззоккез мунөны и мунөны кытш кузя, шыннйлан чужөмбанаөсь, гора голосаөсь.

А зонкаэз пукалөны. Охота нылө өтлаын пырны орсны кытшө, но абу сэтшөм поверье, мед коми зон вермис орсны өтлаын нывкаэзкөт. Кин кутчисяс – лэбтасө сийө насмех, көть сыбөрын и отирыс син одзө эн мыччись.

А поснит челядьыс пыкөмась тшөкаэзнысө ки лапаэзөн да видзөтоны вылісянь, мукөдыс важын ни пишкөны-узьөны пөлать дорын. Оныс эд чөскытжык орсөмысся, көть и узьө, а сө колө мунны видзөтны орсөмсө.

Нывкаэз орсисө «розья мак», сьылісө «мамашенька», сэсся пондісө сөтасьны.

– Меным! Меным! – горөтлөны өт ладорсянь.

– Татчө! Татчө! – чирзөны мөдөрсянь.

Том зоннэз лэбтисө шум, бытьтө кызд вөлись ловзьыштисө.

А кык нывка ветлөтоны джодж шөрөт да юасьөны, кытшөм нывка кинлө колө. Көда нывкаыс оз мун зон дынө, сийө нетшкөвтасө ныввез дынись да вайөтасө зонка дынө, көда корис. Том зон сапырнитас нывкасө косөттяс да пуксьөтас өлөдзас. Киэзнас сийө асыкалас, кызд асыкөн, полө, мед «невестаыс» эз пышшы.

Көр сеталасө быдөннысө, сэк эна жө кык сетались нывкаыс «гөтраласө» сьыланкылөн да вөлись ветлөтоны том гозья гөгөр, юасьөны, кызд ния олөны. И сы коста жө быдөс параэсө окөтоны. Быдөнныс чупөтоны-окасьөны. Зонкаэз шыннйломөн дюттьөтоны пидзөссэз выла-ныс нывкаэсө, а мөддэт сывьяломась дюттьөтиссесө голяэзөттыныс да баитөны «жөниккезныскөт». Окасьөм бөрын орсөм кончайтчө. Нывкаэз пышшөны зонкаэз дынись, а мукөдыс, көда сюрисө друггез дынө, кольччасө да пукалөны. Пуксясө пемытжыкинө да мымда нылө колө баитасө, радуйтчасө, любитчасө...

Вель дыр орсасө өтик керкуын. Сыбөрын юасясө мөдикө, куимөтө.

Асья кадö ни, дыр мыйись ойшöрся петухез китсасьöм бöрын, том отир рознитчöны орсаніннэзісь. Тöлісь мышкыртöм ни юрсö да лöсьöтчö сунгисьны пух кодь небыт кымöроккесö, невна ны вылын шоччисьыштны, а том зон да ныв сё эшö сулалöны ворота одзын, жмитчöны öтамöд бердö, шонтöны сьölöммезнысö донтан кыввезöн да чупötöны-окасьöны.

* * *

Öтпыр кызкö Розосвонас жö, көр Мирош куимöt төв ни чулötис Яран Гаврил ордын, көр сылөн вынсялісöжык киэз, нюжалыштіс мыгөрнас да челядь чужöмыс пондіс вежсьыны том зонлань – Мирош ас синнэзнас казяліс, кинкöt ёртасьö Гаврил, мыйын нылөн вöлі вынныс, мыля быдыс ны кипод увтын, мыля правдаыс только ны сайын.

Сулаліс светтё, гажötчан да кынöм тыртан кад. Бимороза көдзыт рыт каттис Сер посадсö. Яран Гаврил талун мөдötчöм: кокас гөрд гаруснöй серötöм виль пимизэз, вывтас пливойй воротника шабур, юрси мавтöма елейön – свиттялö только, кыздз весötöм лаковой сапогез. Яран Гаврил видзчисьö гөссезöс. Гор вылын сулалö пассезön вевттьöм туран кодь вына изюма брага. Джоджулын быгьясьö только-только сысьялöм сур. Комас шкапокын нөджжасьö гөрд юра «юсь». Горись вачкö чöскыт жаритöм порсьяй дук, дзодзогдук, селянка дук.

Самоварыс веж весötöм, сулалö комас залавка вылын, мыччалö ассис свиттялан кынöмсö.

– Инька, ноко веж жö пызандöрасö, ольсав чочкомö да басökö, – малыштіс юрсö да горötчис Гаврил. – Гөссес менам талун донаось локтасö, куж ныкöt кывсö видзны, куж гөститötны.

А инькаыс котрасьö, метса оз адззы. Ольсалö пызандöраэз, öшötö чышкötтэз, ас вылас кышалö серötöм йөрнös да петуха запон.

Мирош талун эз пет öтөрö, кольчис гортас. Сія кайисполатьö да сэтчин и енöвтчис – шы сылөн абу. Енöвтчис эшö буражыксö сійön, мед видзötны, кызд чулалас рытыс Гавриллөн аслас гөссезкöt.

И гөссез былись чожа чукöртчисö.

Локтісö старшинакöt писарь, урядник да Чебрень пьян. Пырисö шупыткодьюсь ни, тыдалö, асывсьянь эшö ния талун пондöмась гөститчыны.

– Пантав, Гаврил, гөссетö! Мый эм – быдöс шупкы-вай пызан вылö! – тошсö малалöмөн пырис керкуö медодззын старшина.

– Пырö жö, пырö, дона гөсиньöйез, пуксьö да шонтисьö! – котрасьö Гаврил ны гөгөр: лабичсö вештö, табуреткасö сувтötö, брагасö чоужык удавны иньсö тшöктö.

– Тэнö ог ордйö, – чатыра юрөн горötчис урядник, – тэ ордö пыравны позьö... Бурö пö тэныт иньыт изюма брагасö керöма!..

– Инька, мый нö тэ жагöна вөрötчан? Удав чоужык брагасö, гөссес кынмöмась, – горötчыштіс Гаврил, ачыс котöртис комас да кыскис залавка-сис четверть вина.

– О-о! Да сылөн эшö буржык брагаысся тай эм! – серöмтчис урядник.

– Сылөн, ваше благородие, мыйыс абу! Сія эд мортыс сэтшöм – век сылөн тырдоз! – киксöмөн урядникыс бöрсьянь шыасис писарь.

– Ноко, ёрттэз, пуксьö жö пызан саяс, невна көть закуситыштö, мыйön ен шуис, öö гөрд юра «юсьсö» Гаврил сувтötис пызан шөрö.

Быдөнныс пуксисö пызан сайö. Вöлись сэк пондötчис гажötчöмыс!.. Пызантыр Гаврилица ваяліс сёяннэз, мыйыс только сэтön абу: и пöжалöмыс, и пүöмыс, и улыс, и көсыс... Тринötöмөн люкасисö пызан вевдөрö лэбтöм тыра рюмкаэз, пөрötисö горшаныс шонтан да юр бөбтан зеллясö. Одззисö пируйтны, ветлö кругötтяс брага да сур, больгö четвер-

тись югыт аскур. Оз и дугдывлө басни шыэз, шум сулалө керкуын, кин мый төдө, сійө и висьтасьө, кин кыз кужө, сідз и ошшасьө.

– То кытөн менам быдөнныс, то! – жмитіс кырымсө кулаксө да ошшасьө урядник.

– Мый и баитны, тэ эд миян власть!

– Тэ сайын эд быдөс чочком светыс!

Ошкөны урядниксө старшина да писарь.

– Порядоктөг оз позь, – шыннялөмөн отсалө нылө Гаврил, – кыз овны позьө порядоктөг? Сэк эд совсем воля босьтасө голь-шмольс...

– Ладно баитан, ладно! – сылісь пельпонсө лапкөтөмөн шуис Сюлепеткин. – Голь-шмольсө то кытөн колө видзны! – да бөра нямыртіс кырымсө кулакө. – Только Елизар Тихоновичным мукөдпырсяс небыта уджалө, полөмөн нуөтө ассис нырсө.

– Ог жө бөра сідз уджав да... – пондіс баитны старшина.

– Кыдз нө он, вунөтін ни? – өмаліс сійө Сюлепеткин. – А төдан, кыз дорйин Ефремсө, көр сія кодувьяс баитөм земскөй начальникыс йылісь?

– Содтөмась сэтчө уна, весь этө лёбисө, – макнитіс кинас Еля.

– Тэ, Елизар Тихонович, эн вунөт, кадыс өні сэтшөм, ёна колө кыкнан синөн видзөтны. Кытөн мый – торскыны сідз, мед и ловзисьны эз вермө. Крамольниккез пондісө унажык мыччисьны. То нійө кытөн колө видзны! – горөтіс урядник.

– Сідз, господин урядник, сідз! – серөмтчыштіс писарь. – Личытөла мукөдпырсяс Елизар Тихонович видзө поводсө – веськыта тэ баитан. Оні колө синөн овны.

– Миян власть, быдөс миян сайын, дак и кужны колө миянлө веськөтлыны! – гымгис кулакнас пызан кузя урядник. – А сюрас кө кин не миян моз керись, кытшөмкө крамольник – торскыны сэтшөмыслө юр кузяс, мед садьыс быравліс, да тапкыны лёнас, чижовка ыбөссө осьтөмөн – сымда мед сылөн и олөмыс вөлі. Велөтчы овны, Елизар Тихонович, Гавриллэс моз да Егоррес моз, куж көстыны кыккусінь голь-шмольсө! Быдөс миян сайын – и властьюс, и правдаыс. Мийө и кривдасис кужам керны правдасө!... Сідз эд, Егор, – вак-вак серөмтчис урядник да юаліс бокас пукалісь Егорлісь.

– Сідз, господин урядник! – горөтчис Егор, көда чөліс эта минутаөдз, а только пөрлаліс аскурсө рюмка бөрсянь рюмка, көть аслас юрыс нем ни эз вежөрт – бергалас, кыз мельница колесо. – Сідз, господин урядник, колө кужны тэ моз уджавны! Тэ эд мортыс... эх-х – бур!.. нем сэсся буржыксө эз вермы горөтчыны Егор.

Важын ни урядникыс сылөн вөлі веськыт ки. Да и ачыс сія козьналіс Сюлепеткинлө быдса мешөккез шогді пизьөн, порсь тушаэз да дупля виэз. И көть көр, мыйөн бы эз пондө кыйны Егорсө, петас көть кытшөм йиринісь көсөн. Вексө вөлі сы сайын Гаврил кодьөммез сайын правдаыс. Нія только лыддиссисө посадын первостатейнөй мужиккезөн.

– Вежөрти, челядь! – горөтіс старшина. – Öтік миян туйыс! Юыштам өні эта понда – ён гөрөдыс понда!

– Юыштам! Кисьт, Гаврил, быдөнныслө! – горөтіс Сюлепеткин, ачыс чеччыштіс пызан саяс да лэбтіс рюмкасө вылө. Сы бөрсянь сувтісө быдөнныс да сідз жө лэбтісө рюмкаэзнысө.

– Эд вунөтө: быдөс видзсьө посадас миян вылын. Висьтала тіянлө веськыта: төн исправниксянь локтіс гижөт, тшөктө уджавны чорыта, то кытөн тшөктө видзны властьюс! Крамольниккез пө бура пондөмась лэбтыны юрнысө: шушкөны, быдкодь кыввезөн лёбөны, революцияөн повзьөтлыны!.. Кыліт?..

– Революцияөн? – өтік өмись горөтчисө пызан сайын пукаліссез да шлөпкисисө быдөнныс пуксисө.

– То-о, рапмит ни! гымгис пызан кузя Сюлепеткин. – Разь сідз колө пессыны! Видзө властьсө то кытөн! – нямыртис кулаксө да гичир-гичир керис пиннезнас. – Ми эшө көстам кытчөдз голь-шмольсө, ми – власть!.. Но, юам! – и быдөнныс пөрөтисө горшаныс тыр рюмкаэз.

– Только видзө этө баснисө юраныт да ёнажыка видзсьө өтамөд бердө! Сэк мянөс куш киөн он босьт!..

– Мый тэ, мый тэ, господин урядник!.. уськөтчисө быдөнныс Сюлепеткин дынө да пондिसө сійө окавны. А Сюлепеткин сувтис ны шөрө да сулалис, кызд пожумовөй столб, шляпкис өмнас да гичыралис пиннезнас.

Мирош сунгисис пыдөжык юрнас пассаз коласө пөлать пельөсас да эз и лысьт вөрзөтчыны, только ышки-пойки жагөник лолалис и гусьөник вөрисө тырппес, полисө ния өтік кыв – революция. И сійөн буражык эта кылыс вөлі сылө сьөлөмви, мыля быдөнныс полисө эта кылысь, кызд биись. Думаэз сылөн каттисисө эта кыв гөгөр жө, суйыштшсө пыдөжык юр вемас этө шоньтөн лолалан, бичирөн сотан төдтөм кывсө.

Өтөрыс лөнис. Только морозыс гымөтыштліс керку пельөссэзө, посөдз доррезө, да төлісьыс өшалис югьялан донөн паськыт, лөз бекөркодь небо шөрын, кисьтис блед югөрсө чочком гриббезөн сулалан Сер посад керкуэз вылө да небыт лымөн тырөм паськыт ыббез вылө.

8

Өтпыр кызкө тулыснас ни, көр шондыс дыржык кежө пондис янсөтчыны му бердись да крутжыка гуляйтны голубөй небо пыдөсөт, Мирошыс Ефремкөт ветлісө городө. Отсө иньдис хозяиныс няньөн, мед вайны сэтчинись сов, а Ефрем отсалис аслас вөлөн кыскыны сылысь жө, Гаврилыслись, няньсө. Мунисө куим вөлөн.

Өддьөн ни вөлі умөль погодьяыс: туйез паськалісө, юэз лөзөтисө, керөссэзсянь бузгисө шоррез.

Өддьөн тэрмасисө городас вузасьны-небсьыны. Медодзза луннас жө справитисө быдөс делөэзнысө и ой кежас лөсьөтчисө петны бөр туйө.

Рытнас Ефрем вышкыштис Мирошлө:

– Мунам мекөт, ветлам өтілаө, менам эстөн неылын эм төдса морт, колө сы ордө пыравны.

Мирош первуись вөлі городас, охота вөлі сылө видзөтөм могись мунны городөт, – сия лөсьөтчис мунны өтлаын Ефремкөт.

Пемдан кадас ни, вөввезнысө юкталөм да сөдөм бөрын, ния иньдөтчисө Ефремыс төдса ордө. Дыр кежласисө улицаись улицаө, вуджисө кытшөмкө ыджыт площадь, инмисө векнитик улицаокө да пырисө кыксувда керкуө, му пытшкся этажас. Только ештисө оськөвтны порогсө, кызд нийө панталис сьөд юрсиа, неыджыт усока морт:

– О-о! Ефрем тай! Тэ кысянь? Көр локтін? Дыр кежө я? Пуксьы, другө, пуксьы! – кватитис сійө шупыт мортыс ки пөлөттяс да кыскис пызан дынас.

– Здорово, Иван Егорович! – шыасис паныт Ефрем.

– А эта кин тэнат? – мыччалис Мирош вылө Ефремлөн төдсаыс.

– эта мекөт локтис татчө, городас. Мывкыда зонкаок мян быдмө да только грамотаыс оз позь сылө бурасө велөтчыны. Нельөт год ни олө Яран Гаврил ордын срокын, уджөтөны сійө, кызд вөлөс – лун и ой. Эта Окульыслөн зоныс – Мирошыс... – висьталис Ефрем.

– А-а! Вон кин вөлөм! Төда, төда. Но висьтась, кызд ни олат, уджалат? – пондис юасьны Иван Егорович.

– А мый миян олөмыс, ачыт эд төдан: уджсө только бергөт да мед кынөм вөлі пөт... Пуксисө богаттёйс покорень сиви вылө, чупкөны вирнымөс, чераннез. То тай, босьтны көть Мирошсө: вит год кежө сийө сетис Окульыс Яран Гаврил ордө, зонкаыс кынөмыс понда только и уджалө, песө вынсө лун-лун.

– Н-да-а... – нюжөтис Иван Егорович. – Оланыс миян кодьыслө сьөкыт, Ефрем, мый и баитны, вожасьомась эна чераннес вывтаным и кытчөдз ми нийө асьным асланым киэзөн огө чапкө – бур олансө не видзчисьны. Пессян туйыс, Ефрем, өтик – революция. – И эта кылыс өзтыштис чужөмсө Иван Егоровичлись, синнэс өгралисө югыт шоммезөн, бытьтө содтыштис сылөн выныс, чорытжыка да гажөнжык петисө кыввез. – Революция, Ефрем, кылін? И чожа эта революцияыс лэбас! Чожа уджались йөз лэбтисяс да трекнитас аслас сиви вылись энө вирьюись чераннесө!..

– Басниыт тэнат, Иван Егорович, өддьөн бур! Веськыт басниыт! И быдөс, мый бы эн баит, – пыдына кольө юрө, мыйкө кыз саймөтө меын төдтөмө, вильө, коланаө... – Ефрем пыдына ловзисис да бөра кывзис эта повтөм сьөлөма мортлись баснисө.

Жыв керсис и Мирош. И сылөн ёткөп мунис сьөлөмыс. Мөдпырись ни сиа кылис этө вына да бикылөн кывсө. Революция! Ётиккез – урядниккез, Пасторов Еляез да Яран Гавриллэз – полөмөн горөтчисө этө кывсө, кыкисө сийө кытиськө пыдинись только сы понда, мед тыртны сийө нятьөн, лөк кыввезөн, чожажык пөдтыны... А татөн, то эстөн, өні, этө кывсө любитисө, кыз мам ассис медодзза кагасө, бура сийө дөнтисө. Эта квлыс вөлі родной, шоньт, сотчис югыт биокөн быд сьөлөмын, готов вөлі пась-кавны да өгравны, сотчыны югыта-югыта, кыз тулысся мича лун, кыз золотой югөра шөнді... Эта кылыс содтис вын, паськөтис юр, ключөн пизьөтис вир!

Революция!

И вежөртис талун Мирош, мый сиа сэтшөм революцияыс.

А Иван Егорович ачыс өзйис этөн кывнас да сө баитис, висьтасис, велөтис Ефремсө:

– Колө өтувтчыны, колө буражык вынсөтчыны беднотаыслө. Тэ, Ефрем, ёнқодя ни миянкөт көртасин. Кад тэныт пондөтчыны уджавны посаданьт. Окты ас гөгөрат надёжнөйжык морттэзөс, төдсөт нийө миян уджөн, висьтав, кытшөм сулалө одзаным могыс.

– Колас, колас, – горөтчис Ефрем, ачыс сэсся бөра лөсьөтчис кывзыны этө мортсө, көда саймөтис сылись сьөлөмсө да велөтис сийө врагкөт пессьөмө.

– Мийө өні өктам вын, – баитис одзлань Иван Егорович, кадыс сибөтчис сэтшөм, көр пондас ковны петны өтөрө да ас моросөн босьтны властьсө. Не басниөн ни, не корөмөн, а пишаллезөн, пулемөттэзөн, пушкаэзөн!..

Сөр рытөдз пукалисө Ефрем да Мирош Иван Егорович ордын. Уна сиа нылө висьталис виль торсө, бурсө, коланасө.

Мунтөнныс ни сетис Ефремыслө листовкаэз да нейджыт книгаэз:

– Этө нөбөт сьөрат. Лыддьөтө. Да бурасө эн баит ме ордө пыралөм йылись. Буражыксө пов урядниклись. Но, да ме тэ вылө, Ефрем, надейтча, не первуись ни тэкөт пантаси.

– Эн пов, некин нем оз төд. И мийө пондамө лөсьөтчыны сэтчин, посаддэзас, отсавны тиянлө... – шыасис Ефрем.

– Но, а тэ мыйкө вежөртін жө? – лапкөтыштис пельпонсө да юалис Мирошыслись Иван Егорович.

– Вежөрти, – чорыта горөтчис Мирош.

– Бур! Велөтчү, кад ни и тэныт вежөртны. Кывзы Ефремсө, сја тэно умөльö оз велөт, – шуис Иван Егорович. – Ефрем, тэ йитөтсö мянкөт эн öшты, юөртыштлы надёжной морттэзкөт, висьтась удж йывсит. Да уджалö синмөн, кылит? – кольлавны петтөнныс ни эшö содтис Иван Егорович.

– Кывза, Иван Егорович! Бурасö эн пов, кежам этö быдöс видзны только ас сьөлөмын да юрын. Сэтшөм делосö... – шоныта прощайтчисö ния да петисö керкусис.

Квартираö муникö, Мирош юалис Ефремлись:

– Ефрем дядь, кин эта мортыс, кытөн уджалö? Öддьөн сылөн, тыдалö, мывкыда юрыс! – радъялан сьөлөмөн оськалö Ефремыс бөрсянь Мирош.

– Эта рабочöй, уджалö татөн, заводын. Важынокдь ни ми ськөт тöдсасим. Уна ни сја мянös велөтис, уна сетавлис бур книгаэз. Сэтшөм книгаэз, көднö оз туй мыччавны не старшиналö, не урядниклö, көдна йылись оз туй баитны Яран Гавриллэзлö да Чебреннезлö.

– А кин нö сылö сеталö энö гуся книгаэсö?

– Ния асьныс печатайтöны, нылөн эм гуся книга печатайтин. Уджалöны ния быдса организацияэзөн, лөсьöтчöны керны революция, чапкыны царьсö, быдöс земскöй начальниккесö да урядниккесö, – гусьөн висьтасис Ефрем. – Только тэ, Мирош, некинлö эн висьтась, кытөн тэкөт талун вöлим, кылін? Шедөтан сэк менö, асьтö и быдөннысö.

– Мый тэ, Ефрем дядь, но мыля ме висьтася, – полөмөн горөтчис Мирош. Аслыс сё охота тöдны унажык: – А көр тэ ныкөт тöдсасин, кызд?

– Мөймусянь ни ме ныкөт йитси. Перво Филя Миков пондис тöдны Иван Егоровичсö. Төдан Филя Миковсö, көда мөйму мунис Сибиряс? Вот сја вöли и тöдсасьöм, көр уджалис татөн заводас. А сьбөрын ме сыдынö понди вовлыны. Си дз öтпыр да мөдпыр и кысси эта уджö. Некин мян посадын оз төд, только куим морт ми уджаламö: Онтон Гурей, Вай Опонь да ме. Öксьывлам лыддьöтны Вай Опоннез ордö. Сылөн некин абу инькаысса да и керкуыс бокын сулалö. Мукөдпырсяс быдса ойөн пукалам, лыддьöтам.

Кывзö да бура дивуйтчö Мирош. Олö öик посадын, часто вовлö Ефрем-мез ордö, мамыскөт адззисьлыны да баитыштны, а эта йылись талуння лунöдз нем эз тöдлы. То кызд кужöны уджавны!.. Дивуйтчö и сы коста жö öзийö аслас сьөлөмыс, өткөптö шупыта-шупыта, бура донтö этö лунсö, көда сылö мыччалис уна вильтор, мыччалис сэтшөмö, көдасянь сја быдмис быдса юр сувда и мывкыднас и выннас.

Вөввез юкталөм да сөдөм бөрын ния эз талун и пондö ужнайтны – водисö узыны. Рытсаяс быдöс лөсьöтисö, мед асывсянь одзжык, кынтөм коста жö, вөрзьöтчыны туйö.

Дыр эта ойö эз ланьт Мирош. Кытшөм тоько думаэзөн эз тырлы сылөн юрыс, мый только, мый только эз думайт сја эта ойö...

Талунсянь сја пондис невна вежөртны, мый сэтшөм оланыс, кытшөм му вылас правдаыс, мый сайын эта правдаыс.

Усисö тöдвылас кольөм годдэз, кыскисö сийö думаэз сја рытö, көр öтпыр кызкö гожумнас Стречалун лунас насильничайтисö мамсö урядник да Чебрень Егор, кызд сэксянь эшö кымös увтсаяс пондис видзöтны урядник вылö да Чебрень пияннез вылö. Лөгыс сэк тыртис сылись сьөлөмсö, лөг сы понда, мыля ния быдöс вермöны керны, мыля ны сайын выныс. Эз сэк Мирош эшö вежөрт только öтикö: мыля ния вермисö сідз асныритны, а от-вет видзөмись нильдөтчисö, кызд налиммес.

А öни то оссисö синнэс – богаттё да урядниккез керöны öтдор, ны сайын быдöс: и выныс, и правдаыс.

Нештөм арся зэра кымөрөн паськалыштис юрас дума суддэз йылись. И эта учөтик, кайварыш ныра мортокыс – земскöй начальниккыс – сідз жö уджалö öтдор богаттөкөт да урядниккезкөт. Пизис зонкаыслөн пым

сьёлөмыс, лөгөн тырис сја эна морттэз вылө, көдна гажөтчисө-олисө да мый нылө коліс, сійө и керисө, кызд только кужисө, сідз и кешитчисө гов отир вылын.

Усисө төдвылас и быдөс эна медбөрья годдэс, көднө сја оліс Яран Гаврил ордын. Мыйсө эд только сја эз адззыв, кытшөм только сьөкыттэз эз пантасьлө сы оланын, кызд только сылісь эз чупкы пым да том вирсө Яран Гаврил. А мымда Мирош новйөтө ас вылас видөмсө, вартлөмсө, пемыт ойлунсө.

Кызкө тай өтпыр чуть не кулавтөдззас сійө вартліс хозяиныс, печегнича кодь быдөс вөлі яйыс. А деловыс вөлі сідз.

Гожумнас өтпыр кинкө кольөма йөр воротасө осьтөн, и сэтчин инмөмас пырны курөггез да бабукаөн типпез. Казяліс Гаврилица курөггесө да лэбтисис чижьявны:

– Бөра, лешак пияннэз, көдакө йөр воротасө осьтөн кольөмныт, быдөс ни курөггес гряддэсө гуддисө, быдөс кыскалісө бобиэсө да анькытшсө. Мирошко, дыш куль. Котөрт чожажык да вашөт курөггесө!

А Мирош пукаліс посөдзас да мыйкө лөсйисис пуртөн – керис аслыс кытшөмкө мельница. Чеччөвтис поспу вывсис да котөртис йөрас. Бөрсняс видчытөн петис ачыс Гаврилицаысө

Мирош панөвтис курөггесө да вашөтис вороталань. Петисө курөггез, только өтик типок эз адззы туйсө да котөртис бокө бороздаэз коласө. Мирош бөра сійө панөвтис. Типок уськөтчис ворота дынө.

– Кш-ша-а!.. – горөтис Мирош да нарочноись, радувьяс ни, что быдөннысө вермис вашөтны огородечсис, шупкыштитис типокыслань пуртнас. Пуртыс, кызд нарочно, сапкисис только мөртчис типыс спинаө. Трек-трек керис коккезнас типок да нюжөтис голясө. Эшө буражык лэбтисис чижьявны Гаврилица.

– Мый тэ этө керин, лешак чужөм тэ, медбур типсө эд вийин! А-а?! – нөштөм голосөн, чижьялөмөн сибөтчис сы дынө Гаврилица.

Сы коста огородеч ворота одзын мыччисис ачыс Гаврилицыс. Сапырнитис Мирошөс юрсийөттяс да но жө клөпөтны пельбоккесө, но жө обравны кулаккезнас, кытчө сюрө, сэтчө и сөтө, мымда эм выныс, сідз и пазйө-вартлө зонкасө. Чегис сэк Мирошлись кык пинь, вирсорнас Мирош сьөвзис пиннесө, көдна усисө турун коласө межа длөорас.

И мыйсө сја эз адззыв, кытшөм только кешитчөм эз вөв сы вылын Яран Гавриллэз ордын овтөн.

Сьөрсьөн-бөрсьөн паськалөны юрас картинаэз, висьталөны ас йывсиныс, тшөктөны босьтны төдвылө кольөм луннэсө. И етша эна касьтылөммез койисө шоньтөн да мича думаэзөн, етша вөлісө Мирош понда гажа да долыт луннэс. Курытөсь ния вөлісө өддьөн, солаөсь да пым синваөн кыскалөмөсь... И кытөнкө пыдына пукаліс вемас эта медбөрья төдсасьөмыс талун рытнас, эна биөн сотан да югыт кыввез Иван Егоровичлөн. Бичирөн ния сотчисө сьөлөмас, и сьөкыт нйө өні вөлі кусөтны, кызд көс гожумө вөр пожар. Шонтисө шонді югөррезөн эна кыввес Мирошлись сьөлөмсө, вевтисө быдөс мукөд думаэсө, лөк да гажтөм думаэсө. Асья ойөн ни тшакыльө каттисис быдөс юрас, перво вунөтчис моз, вөлісь ланьтис.

Пемыт эшө вөлі, саймөтис сійө Ефрем:

– Колө тэрмасьны, вөтис миянөс татөн тулысыс, мед туй вылас кытчөкө не сибдыны. Кын вылөттяс көть мымдакө гөнитыштам.

Тэрмасьөмөн сөйыштитисө-керисө да петисө доддявны вөввез.

Лөз югдіс, гөрд сарафанөн козьнасис асьв, чаркис кынтөмыс кок увтын, өтөрыс көдздөтис вывтыр. Оддьөн кокнита лолассис эттшөм мича да көдзыткодь тулысья асылө.

Вөрзбөтчсисө туйө.

Бур вөлі мунны асывсяняс, кокнита кынтөм вылөттяс ыскөвтисө дод-дез, гөнитисө мукөдинөт шупыта. Но только ештис мыччисьны шондї, кисьтны ассис ем йыла пым югөрресө, кыз нырпыссялис лым да пондїс горзыны сөдз синваэзөн. Шупыта туйыс сылис да съөдөтис эшө өддбөнжык.

9

Одз таво аслас кипод увтө босьтис быдөс тулысыс. Апрель месяцянь жө петисө мича, шондїа луннэз. Ния шупыта топөтисө, нырпыссьөтисө лымсө и туйсө. Сыбөрын вачкисө зэроккез, көдна ниль керисө, нуөтисө му вылись чочком шебрассө. Пөльтчисө лөз кынөма юэз да өдззисө гуляйтны, өштісө быдөс береггесө дор не конец.

Сер посадын пондїсө лөсьөтчыны петны ыб вылө. Съөкыт вөлі бедноталө бергөтчыны көдзан кадө. Мукөдыслөн и кырымөн койыштны абу көдзысыс. Но мый сэтөн пондан керны? Көдзтөг эд мусө он коль. Он кө көдз, дак мөдігод колас тшыгйөн кувны. Öтїк туй кольччө говвезлөн – мунны кеймисьны Яран пияннэз да Чебрень пияннэз ордө.

А ния чатралөны зобнысө, шынь серөмтчасө өм пельөснаныс да ласкова горөтчасө паныт кориссезлө:

– Көдзысокыс колө? Но мый эд керан, колас сетыштны, кольччас жө, поди, невнаыс. Только отсыштан меным гожумнас: локтан гөрны, сэсса переезд-мөд отсалан вундыны. Сета инө. А сэтчин кыз лыддисям.

А Гаврил, дак сїа, кыз руч. Көр локтасө сы дынө кадуля көдзысла, кеймисьөны одзас, чуть пидзөс выланыс оз кыскасьө. А сїа малыштыштас тошоксө, ылісянь пондөтас баснисө, кутас висьтасьны деддэс йылісь. Кыз ния олөмась, пыр пессьөмась сирньылөмын, уджалөмась ныр вылө усьтөдз, – сы моз жө, Гаврилыс моз. Сыбөрын вөлісь мунас комас да пондас жольөтны ключезнас.

– öй эд керан, кинлө кыз ен шуөм овны. Умөля жө вот ті уджалатө. Сетнытө ме сета, да только мед бөра ті отсалїт меным асьныт. Мый эн баит, а миянлө өтамөдтөг некыз оз позь овны: ме тїанлө отсала сюөн, а ті меным – уджөн. Сїдз сїа и енсянь шуөм овны.

Сеталас Гаврил тулыснас көдзысоксө соседдэзлө, а гожумнас вөлісь ниртө сылө джын посадыс уджалө, а Чебрень пияннэзлө – мөдджын посадыс. Кыз эн видзөт, көдөрсянь эн кватит, а Яран пияннэзлөн да Чебрень пияннэзлөн, көть и дасїсьөн унажык көдзөмыс – сө ни страда ештас медодз, быдөс сюыс чукөртчас керку сувда, паськыт да кузь шороммезө.

Быд тулысө беднота талис эна первостатейнөй отирлісь пороггесө, көсталїс отир коссө перво порога увтас, а сыбөрын песїс высинсө ны видзез вылын да ыббез вылын.

И таво тулыснас сїдз жө нем эз вежсьы Сер посадын. Лун-лун көзичаока отир полөмөн пырис Яран Гаврил да Чебрень Егор керкуэзө, кеймисьөмөн висьталїс ассис могсө.

Öтнас только Ефрем кызкө боки тальчис этө годїсь годө юждөм важ туйсө. Эз сїа мун кеймисьны богатынаэз ордө. Вузалис медбөрья мөссө да сїа деньга вылө небис көдзыс. Ась пө кольчча мөстөг, кызкө, поди, арнас пө шедта деньгасө да бөра йывсьөта, но богатынаэзлө сэсса горб көстыны ог мун.

Сїдз сїа и керис.

Первуись Ефрем медодзза лунас жө петис гөрны аслас пиня пасьта полосаок вылө. Дивуйтчөны отир, кыз, мыля Ефрем таво уджалө аслас му вылын? Ештөтчис аслас полосазз вылын да Öкульыслө эшө öтїк пельөсок

көдзис. Көть невна Өкульлөн өні көдзысокыс – пуд етш – да сёжө мымдакө өксяс.

А Мирошөс таво Гаврил кутчөтис гөр юр бердө. Эшө ыб вылө петтөдз кызкө павжнайтікө сылө баитө:

– Но, Мирош, мыгөрокыт тэнат бура ни содіс, таво колас кутчыны гөр юр бердө. Вөввез менам, ен ныкөт, оз ков кысйөтны плетьөн, муэз небытөсь – только чышкы-гөр. Нывкаэз дынө, тыдалө, маласьлан ни, а гөрны он куж, сідз абу жө эд бытшөм. Кутчөтам таво, пешлісь, кызс сія няньыс шедө.

Шы эз сет Мирош, только ыш ловзисис да мелькнитыштісө юрас югыт думаэз: вот бы эталө мыччавны революциясө... Ужо адззылін бы, кытшөм сія: чөскыт али курыт...

А тулыс керис ассис уджсө. Шөнді каттыштіс лыммесө гудыра шоррезө. Больгөмөн, бузгөмөн ния нуисө лыма ваэсө юэзө да содтісө нылісь мыгөрнысө.